



SPOT JENELIS GAT ASOSIESEN: Ol nius manmeri husat save raitim stori na toktok long spot insait long PNG i gat wanpela Asosiesen bilong ol yet nau. Ol Spot Ripota i bin kamapim wanpela bung bilong long Tunde dispela wik long opis bilong PNG Olimpik Komiti long makim ol komiti bilong ol wantaim sapot bilong PNG Midia Kausol. Ephata Samuel bilong NBC em nupela presiden, Jeremy Mogi bilong EMTV em Diputi Presiden na Quintina Naime bilong PNG Loop em Tresera na Seketeri. Long poto Seketri bilong Olimpik Komiti Raphila, nupela spots jenelis asosiesen presiden Ephata Samuel, tresera na seketri Quintina Maime, Deputi President bilong Midia Kaunsol, deputi presiden bilong spot jenelis asosiesen Jeremy Mogi na presiden bilong Midia Kaunsol Alexander Rheeney.

Poto na Stori Nicky Bernard.

LNG mani i stap we?

BIKPELA mani tru olgeta manmeri long Papua Niugini i putim ai long en i no kam insait yet long kantri na i no stap long kantri, Oposisen Lida Don Polye i tok.

Mista Polye i autim dispela toktok hap asde long Pot Mosbi taim em i painimaut olsem mani bilong ol papagraun na pipel bilong PNG i no stap long Benk of PNG o Sentral Benk.

Tasol Benk ov PNG Gavana Loi Bakani i bin tok mani PNG i kisim long LNG ges i stap long wanpela tras akaun wantaim Sentral Benk.

Mista Bakani i tok ol papagraun bilong PNG LNG Projek bai kisim ol ekwiti na royalti mani bilong ol taim gavman i pinisim ol wok painimaut long glasim gut na painimaut ol tru tru papagraun husat inap long kisim dispela mani.

Dipatmen ov Petroleum na Enesi i mekim dispela wok painimaut.

Nesenel Kot jas Jastis Ambeng Kandakasi tu i wok long helpim ol papagraun long glasim gut wanem lenona grup i tru tru papagraun bikos planti lenona grup na manmeri i wok long tok ol tu i papagraun.

Praim Minista Peter O'Neill i tokim ol papagraun long Tari na Komo long Hela Provins las wik olsem ol ekwiti na royalti mani bilong ol long PNG LNG Projek i stap gut tru long wanpela tras akaun long Sentral Benk.

Fainens Minista James Marape tu i bin tokim Waigani Ap-Det semina dis yia long Yunivesiti ov PNG olsem ol ekwiti na royalti mani na sampela ol Infrastraksa Development Gren (IDG) na MoA fan mani bilong gavman na papagraun wantaim i stap long Sentral Benk insait long PNG.

Tasol Mista Polye i tok Mista O'Neill na Mista Marape i wok long

giamanim ol manmeri taim LNG mani i no kam insait yet long kantri na tu mani i no stap insait long Sentral Benk.

"Dispela mani i stap long tras akaun long Sentral Benk em i mani we mi bin stap Tresera na putim long givim long ol papagraun olsem IDG na MoA fan mani," Mista Polye i tok.

Mista Polye i tok em i bin stap Tresera na kamapim dispela tras akaun wantaim Sentral Benk long putim ol IDG na MoA fan mani.

"Em ol mani bilog IDG na MOA fan tasol. Em i no mani gavman i kisim long LNG."

"Mi bin kamapim dispela tras akaun we Praim Minista na Fainens Minista i wok long amamas long toktok yet long en," Mista Polye i tok.

Em i tok LNG mani PNG inap long kisim long en i nau wok long go insait long wanpela eskro (es-

crow) benk akaun bilong invesmen benk Yunion Benk ov Suisalen (UBS) long Singapo.

Mista Polye i tok Nesenel Petroleum Kampani PNG (NPCP) i bin makim maus bilong PNG gavman na sainim wanpela agrimen ol i kolim 'peimen daireksen did' long larim ol LNG mani bilong PNG i go insait long eskro benk akaun bilong UBS.

Em i tok ExxonMobil PNG i wok long salim LNG mani i go insait long wanpela kampani ol i kolim GLOCO.

Mista Polye i tok ExxonMobil i bin kamapim GLOCO na em i ran olsem wanpela spesol pepes kampani. GLOCO i wok long salim ol dispela LNG mani i go insait long UBS, we PNG Gavman i bin kisim K3 bilien dinau mani.

ExxonMobil i tok olgeta mani bilong papagraun i stap wantaim dispela tras akaun long Sentral Benk.

Ol narapela projek patna bilong PNG LNG Projek olsem Oil Search, Santos, MRDC na JX Nippon i kisim pinis winmani ol i mekim taim Saina, Jepan na Taiwan i baim LNG.

Tasol PNG Gavman na ol papagraun i wet yet long kisim sea bilong ol. Ol savaman long Nesenel Risets Institut (NRI) tu i paul long wanem hap stret dispela mani i stap.

"Mipela i ting gavman bai kamapim Sovren Welt Fan hariap na larim LNG mani i go insait. Tasol gavman i wok long kirapim SWF isi isi tru. Gavman i tok LNG mani i stap gut long tras akaun wantaim Sentral benk tasol nau yet mipela i no save LNG mani i stap long wanem hap stret," NRI Dairekta Dokta Charles Yala i tok.

I go moa long pes 2...

INSAIT
Today
bilong mun
Oktoba i stap
insait -
P9,10,19,20


**Fiji - Place
to be...**

**Tuna Foram
stori na
poto long
P8 na 21**

**Olgeta meri
mas wokim helt
sekap olgeta
taim- P11**





Australia mekim nupela polis bareks

Tupela nupela haus bilong Bumbu polis bareks long Lae.

GAVMAN bilong Australian, aninit long AusAID program na Papua Niugini-Australian Polising Patnasip, bai kirapim tupela nupela haus bilong polis long Bumbu Bareks long Lae, Morobe Provins.

Dispela tupela nupela haus bai dabol stori singel kwota polis bareks we em bai gat 140 rum bilong ol polis man na narapela haus bai gat 48 rum bilong ol polis meri.

Dispela haus bai larim ol polis manmeri i gat gutpela haus long stap na mekim wok. Tupela haus wantaim bai gat kit-sen o ples bilong kukim kaikai, ples bilong wasim klos, na batrum long waswas.

Tupela haus wantaim bai gat ol samting bilong putim pipia

na rabis. Bosman bilong Australian Federal Polis (AFP) Diploimen lo Papua Niugini Asisten Komisina Alan Scott, i tok “Minista bilong Polis i askim mipela long helpim polis wantaim nupela haus.

Mipela i wokbung wantaim polis hia long PNG long kirapim dispela tupela huas long larim ol polis manmeri i gat gutpela haus long slip na mekim gutpela polis wok.” “AFP i helpim tu moa long 500 polis manmeri long Mosbi long kisim nupela haus.”Mani mak bilong dispela tupela haus em i sanap long K6 milien. Ol konstraksen wok bilong dispela haus bai pinis long mun Novemba na ol nupela polisman bai muv go insait na slip long Krismas taim.

Long makim stat bilong ol konstraksen wok long kirapim dispela nupela polis bareks, Morobe Gavana Kelly Naru,

Polis Komisina Gari Baki, AFP Asisten Komisina Alan Scott na Australian Hai Komisin Minista Kaunsela Rod Hilton i bin kamapim graun breking seremoni las wik Fraide long Lae.

“Lo na oda em i wok bilong Gavman bilong PNG na Australia wantaim long stretim na mipela mi stap redi long helpim PNG. Taim yumi stretim lo na oda long ples, ol pipel long komyuniti bai stap gut na kantri bai kirap,” Mista Hilton i tok.

Hela pipel amamas long O’Neill

HELA pipel i amamas long Praim Minista Peter O’Neill i promis long givim ol pawa, haus sik na ol rot long kirapim nupela provins na mekim laip bilong manmeri long ples isi.

Planti manmeri long Fesbuk na sosel midia i bin apim nem bilong O’Neill na tok amamas long gavman.

Las wik yet, Fesbuk pes bilong Hela Developmen Forum na Hela Politikel Forum i bin pulap tru wantaim ol tok tenkyu na amamas i kam long moa long 2,000 manmeri husat i save yusim Fesbuk.

Praim Minista O’Neill i bin go lukim Hela las wik Trinde na Fonde we em i bin lonsim K600 milien rot projek long putim kolta na silim Tari-Komo, Tari-Mendi and Tari-

Koroba seksen bilong Hailans Haiwe.

Mista O’Neill i bin tokim moa long 20, 000 manmeri Hela long Tari las wik Trinde olsem gavman bai givim pawa saplai, nupela haus sik na ol nupela rot wantaim kolta long senisim provins.

“Mi promisim tripela samting tasol; pawa saplai, nupela haus sik na rot wantaim kolta,”Mista O’Neill i tok.

Em i tok Hela bai gat nupela haus sik long Tari na Oil Search bai mekim dispela nupela haus sik.

Oil Search bai menesim dispela nupela haus sik na menesing dairekta bilong en Peter Boten bai kamap siaman bilong Tari haus sik.

Pawa saplai bai kam long

Hides ges fil. Dispela bai nambawan taim bihain long moa long 20 yias we ol Hela pipel bai kisim pawa i kam long ges long Hides.

Em i tokim ol papagraun long LNG projek eria olsem ekwiti na royalti mani bilong ol i stap gut long wanpela tras akaun wantaim Sentral Benk.

“LNG mani bilong yupela i stap gut. Nogat wanpela man i putim han long en.

Em i stap gut wantaim Sentral Benk. Bai yupela i kisim dispela mani long Tari taim Dipatmen ov Petroleum na Enesi i pinisim ol wok painimaut long glasim gut na painimaut ol tru tru papagraun stret,”O’Neill i tok.

Hela Gavana Anderson Agiru tasol i no bin stap dis-

pela taim bikos em i sik na stap yet long haus sik long Saina.

Tasol ol olgeta tripela memba - James Marape (Tari-Pori), Francis Potape (Komo-Margarima) na Philip Undialu (Koroba-Kopiago) i bin stap long kisim Praim Minista wantaim delegeesen bilong en i raun long provins.

Gavana Agiru i tok em i hat long joinim ol tripela Hela lida wantaim Praim Minista na salim tok amamas bilong en i kam long dispela raun.

Mista Undialu i tokim ol manmeri long sapotim gavman long kirapim provins na wanpela samting em i askim ol manmeri em long no ken askim kompensesen mani taim konstraken wok i kamap long putim kolta long rot.

Madang Iлектrel Opis tokaut long dinau

Isaac Liri i raitim

MADANG Iлектorel opis long Madang i tokaut long dispela wik olsem ol i gat dinau wantaim ol kampani na ogenaisesen husat i save givim ol sevis.

Provinsal Iлектorel Menesa, Peter Yasaro i tok dispela dinau i stap long mani mak olsem K4 milien na ol i laikim Nenesel Iлектorel Komisen long Mosbi long lukluk insait long dispela hevi na stretim sapos ol i ken.

Yasaro i tok dispela dinau i bin stap bipo taim olupela menesmen i bin stap. Em i tok em i bin kisim posisen olsem Iлектorel Menesa long pinis bilong las yia tasol na i bin painim aut long dispela dinau.

Yasaro i tok em i toktok wantaim ol memba bilong ol dispela ogenaisesen o kampani husat i bin save givim ol sevis tasol ol dispela ogenaisesen o kampani i wok long toktok wantaim bel kros bikos ol i laikim mani bilong ol kwik taim.

Ol dispela kampani o ogenaisesen i bin givim transpot, akomodesen na tu ol arapela kain sevis long 2012 Nenesel Ilekksen, 2013 Bai Ilekksen, 2013 Lokal Level Gavman Ilekksen, na 2014 rikaun.

Yasaro i tok sapos dispela hevi i no stret hariap provinsal ilektrol ofis bai lusim ol dispela gutpela ogenaisesen o kampani na bai kisim taim nogut long taim bihain.

8-pela trabel i kamap long Sande

OL polisman i mekim 4-pela ares o holim pasim bihain long 8-pela krait i bin kamap long Sande Septemba 27. Dispela ripot i kam long opis bilong Deputi Komisina bilong Polis na Sif bilong Operesen Mista Jim Andrews.

Dispela 8-pela krait em ol; kamapim bagarap long bodi bilong narapela, wokim pasin no gut, brukim lo long kamapim bagarap long narapela, gat tingting pinis long kilim dai barapela na wanpela bek reip.Tupela krait i bin kamap

long Oro Provins na 6-pela krait i bin kamap long Nenesel Kapitel Distrik.

Long Septemba 10, 2015 long Popondetta namel long 2 na 3 kilok, saspek Nelson Simbiri i paitim susa bilong en, Christina Simbiri na kandere bilong en Maria Kini wantaim wanpela paiawut.

Taim ol i kisim tupela meri i go haus sik, ol dokta i tok tupela i dai pinis. Saspek Nelson i nau stap long Popondetta polis sel. Em i wet long go sanap long kot.

KCH, PNGDF sainim Lagatoi siti agrimen

KUMUL Konsolidedet Holings (KCH) na PNG Difens Fos i sainim wanpela agrimen las wik Trinde long larim long wokbung wantaim long muvim HMP-NGS Basilisk bes i go aut long ples we nau i stap long en.

Nau HMPNGS Basilisk bes o bes bilong ol ami i stap long sait bilong Pot

Mosbi sip bris. Tasol dispela ples bai kamap Lagatoi siti. Dispela siti em i nupela siti we KCH bai kirapim long nau Pot Mosbi sip wof i stap long en.

Taim ol i muvim bes bilong ami i go aut, KCH bai mekim ol wok long kirapim dispela nupela siti.

Ol i bin sainim dispela agrimen long Mari Bareks

we ol opisa bilong PNGDF na KCH wantaim i bin witenesim.

Menesing Dairekta bilong KCH Garry Hersey i tok tenkyu long PNGDF long wanbel na givim dispela graun long larim siti developmen i kamap.

Em i tok Pot Mosbi bai senis na KCH i go pas long larim siti i kamap gut tru na

senis.

“Nupela Pot Mosbi wof bai kamap long Motukea,”Mista Hersey i tok.

Komanda bilong PNGDF Brigeda Jeneral Gilbert Toropoi tok PNGDF i amamas long muv g aut long nupela ples na larim dispela ples i kamap siti we olgeta manmeri PNG bai kisim benefit.

lalibu-Pangis distrik laikim LLGSIP mani long gavman

FAIVPELA lokol level gavman kaunsil presiden long lalibu-Pangia distrik, Sauten Hailans Provins i singautim nesenel gavman long givim LLGSIP mani.

Ol kaunsil presiden bilong Kuare, Is Pangia, Saut Wiru, lalibu na Kewabi i laikim gavman long givim ol lokol level gavman sevis impruvmen program (LLGSIP) mani long larim ol long pipel i kisim sevis.

Ol i mekim dispela toktok taim ol i kam long Mosbi long givim ripot bilong LLGSIP mani ol i bin yusim long yia 2013 na 2014.

Ol i givim ripot long Dipatmen ov Implementesen na Rurel Developmen.

"Mipela i askim nesenel gavman long apim mani mak bilong LLGSIP i go antap long K1 milien bikos K500, 000 nau mipela i bin kisim long yia 2013-2014 i no inapim mipela long karimaut ol LLG projek," ol presiden i tok.

Ol presiden i tok ol i stap klostu long ol pipel long ples tasol moa mani i save wes nating.

MRDC inves long bihain taim

Wel na ges bai pinis tasol manmeri bai stap yet.

Ol fiutsa generesen o ol pikinini long bihain taim bai no inap long kisim wanpela benefit long ol wel na ges yumi gat nau sapos yumi no sevim sampela mani long larim ol i kisim benefit.

Dispela toktok i kam long Augustine Mano, menesing dairekta bilong Mineral Risos Developmen Kampani. Mista Mano i mekim dispela toktok taim MRDC i tokaut long K40 win-mani Petroleum Risos Kutubu (PRK) i bin mekim.

PRK emi wanpela sabsideri kampani bilong MRDC.

Mista Mano i tok PRK em i wanpela lenona kampani tasol ol i mekim gut ol invesmen bilong ol long larim ol pikinini i kisim benefit long bihain taim.

"Mipela i wok long inves long ol hotel na propeti. Dispela em i invesmen mipela i mekim long larim ol pikinini bilong mipela long bihain taim bai kisim benefit," Mista Mano i tok.

Em i tok ol papagraun long Kutubu aninit long PRK na ol papagraun bilong Ok Tedi Maining bai mekim nupela Hilton Hotel long Pot Mosbi.

"Mipela i kisim wanpela biknem hotel i kam insait long kantri. Dispela em i soim olsem wel n ages bai pinis tasol turis na propeti bisnis bai stap yet,"Mano i tok.

Em i tok PRK i bin westim moa long K20 milien taim ol i bin tingting long kamapim wanpela nupela hotel long Boroko.

"Mipela i bin holim 10 pesen sea insait long dispela projek. Wanpela kampani bilong Saut Korea, husat i bin kamap olsem projek patna bilong mipela i bin holim 90 pesen,"Mista Mano i tok.

Ol i nau kot yet long dispela projek.

MRDC wantaim ol lenona kampani i wok long inves long Fiji we turis bisnis i wok long mekim moa mani.

Polisman luksave long wanwok husat i dai pinis

OL polisman long PNG i luksave long ol arapela wanwok bilong ol husat i bin lusim laip taim ol i bin mekim ol polis wok.

Det Septemba 29 em i wanpela de we ol polisman i save bung long luksave na tingim bek long ol arapela wanwok polis opisa bilong ol husat i bin dai taim ol i bin mekim polis wok.

Polis Komisina Gari Baki i tok dispela det em i wanpela taim tasol we ol polis opisa long Australia, Nu Silan, Samoa, Solomon Ailans na PNG i save bung na tingim bek long ol poroman long husat i bin dai.

Nem bilong dispela de em i Nesenel Polis Rimembrens De na namba wan de bilong dispela i bin kamap long Septemba 29, 1989 bihain long ol polis komisina bilong Australasia na Saut Wes Pasifik rijon i bin wanpela na sainim wanpela agrimen long yia 1988 long luksave na tingim bek long wanwok bilong ol husat i bin dai.



Ol kaunsil president bilong lalibu-Pangia.

Thank you **BSP!**

BSP Home Loan helped us to purchase our first house. Our son now has his own room. We have our own kitchen and a whole yard to host a family Kaikai.

David Jonah
First Home Buyer



A range of home loan products for first home buyers and existing home owners.



FIRST HOME OWNERSHIP

1. Maximum Loan K400,000
2. Interest Rate 4% pa
3. Maximum Term 40 years
4. Equity 10%



HOME LOAN

1. Flexible Loan Amount
2. Interest Rate 8.45% pa
3. Maximum Term 25 years
4. Equity 30%



320 1212 / 7030 1212 - 24/7

servicebsp@bsp.com.pg

www.bsp.com.pg f t l n



Riviu bilong dispela wik...

Wara projek i op – Madang

KURUM viles long Karkar Ailan long Madang provins i amamas long nupela wara projek bilong ol i op long las wik Fraide.

Dispela i kamap taim ol i lukim strongpela san i draim olgeta wara bilong ol.

Dispela fanding i kam long Sumkar distrik developmen atoriti.

Memba bilong Sumkar, Ken Fairweather i tok orait long K200, 000 long pinisim dispela projek wantaim banis bilong em.

WHP i statim awenes bilong ol pikinini – WHP

WANPELA bikipela awenes awenes bilong pikinini abius o mekim nogut long ol pikinini i go aut long 4-pela distrik bilong Westen Hailans provins.

Komyuniti developmen divisen bilong Westen Hailans edministresen i go pas long wok wantaim ol polis, ol haus sik na ol sios aninit long long het tok “End Violence against child” o “Stopim Vailens egensim pikinini”.

Namba wan awenes i kamap pinis long Baiya Veli long Fraide na bai i go aut long Tambul, Hagen Sentrel na Dei Distrik.

Ol i stilim ol rilif saplai – SHP

OL i bin stilim wanpela kontena pulap long ol kaikai bilong ol pipel i kisim bagarap long ais i pundaun na strongpela san long Erave Distrik bilong Sauten Hailans provins.

Ol pipel i slip namel long rot long Kagua distrik i blokim rot wantaim wanpela bikipela hap diwai na stopim kar. Ol i rausim ol beg bilong rais, tin pis, oil, sol na ol narapela samting tu.

Ol pipel long Erave i belat na i no wanbel tru olsem ol kaikai bilong ol lus long han bilong ol stilman.

Ekting Deputi Polis Komisina i givim tok lukaut

EKTING Deputi Komisina bilong Polis na Sif bilong Opere-sen, Jim Andrews, i givim strongpela tok lukaut i go long ol provinsal na divisenel polis komanda long lukautim gut olgeta polis, wok manmeri na ol risos aninit long lukaut bilong polis.

Andrews i givim dispela tok lukaut bihain long em i painimaut olsem wanpela bikipela paul pasin i kamap we sampela polisman i no wok aninit long ol eria komanda i makim na givim, na ol i wokim praivet wok bilong ol.

"Ol dispela polisman i yusim ol polis yunifom, polis kar na ol gan bilong polis na i wokim praivet bisnis bilong ol narapela kampani o ogenaísesen," Andrews i tok.

"Ol i yusim ol propeti o samting bilong gavman, taim na risos we gavman i ken yusim long karim kantri i go het long en, na ol i bagarapim long hap rot na em i no gutpela pasin.

"Eksampel em i olsem, Nesenel Kapital Distrik (NCD) i gat 1, 200 polisman na polismeri, tasol yu bai no inap long lukim planti bilong ol long ol strit bi-

long Pot Mosbi o long 8-pela siti polis stesen. Ol i stap long we?"

"Mi kisim ol ripot olsem ol polisman i wokim praivet wok long kisim moa mani. Sampela i kamap sekyuriti gad o praivet eskot, na ol narapela polisman i mekim ol hait toktok wantaim ol lain i salim buai na i helpim ol long kisim buai i kam insait long siti.

"Ol i stopim buai tasol ol polisman i mekim dispela wok long kisim tri i go inap long 5 tausen kina long wanpela wik."

Andrews i tok moa olsem em

i i laikim olgeta komanda long wokim wok gut na tokim ol polisman na polismeri long stap long wanwan wok hap bilong ol long sevim 7.8 milien pipel long PNG.

"Edministresen bai skulim ol polisman o polismeri gut na ol komanda bilong ol tu, sapos mipela i lukim wanpela polisman o polismeri i wokim wok long narapela eria i stap," Andrews i tok.

Mipela bai skulim ol komanda tu bikos ol i no fit long kontrolim na tokim ol memba bilong ol long wok gut."

Nu Ailan selebretim 40 yia independens wantaim kastom

Stori na poto - Ahimsa Kibikibi long Nu Ailan

OL amamas bilong makim 40 yia eniveseri bilong independens insait long Nu Ailan provins i bin gutpela na i bin bikipela samting tru taim pasin kastom i go insait.

Long nambawan taim tru nau, selebresen i bin kamap ausait long wanpela rurel LLG, i stap long ailan. Dispela i lukim planti man, meri na pikinini i pulimapim ol bot na go long Konomatalik, we nupela Nu Hanova hai skul i stap long en.

Bilong makim 40 yia bilong Independens eniveseri, ol i bin opim ol nupela projek olsem nupela bris bilong sip, liklik haus sik o klinik, nupela dabol klasrum na tu brukim graun long statim wok bilong wanpela rot raunim ailan bilong Nu Hanova.

Long 16 Septemba, 2015 Independens de stret, kainkain pilai, singsing tumbuna na kwaia i bin kamap na i mekim Independens de i kala, kala tru.

Plak bilong PNG na Niu Ailan, ol polisman i bin apim wantaim stail taim ol i go antap long Solwara wantaim ol mambu ol i pasim wantaim na apim i go antap.



Ol polis i apim plak bilong Nu Ailan na PNG long mambu pos antap long solwara.

40 yia makim independens long Nu Ailan gavman na pipel, i bin taim bilong luksave long ol gutpela lida we provins i bin gat na tu hamamas long luksave long wok bilong ol insait long kantri, PNG.

Gavana bilong Nu Ailan, Sir Julius Chan wantaim Minista bilong stet enteprais, Ben Micah, ol araprla bikman olsem pastaim embeseda

makim PNG, Sir Noel Levi, ol bikman bilong Newcrest Main-ing na ol senia opisa insait long provinsal gavman i bin stap wantaim ol pipel long dispela selebresen.

Minista bilong Stet Entaprais na Kavieng Open memba, Ben Micah i bin wokim pasin kastom i go long Sir Julius Chan long givim pati lidasip long em. Pik, kaikai i no tan na mani bi-

long ples o mies, ol i givim long Sir Julius long dispela taim.

I bin gat wok kastom tu namel long 5-pela klen bilong ol papa graun, husat i givim graun bilong ol long gavman i putim sevis long en.

I bin gat bikipela kaikai bung na bihain ol lain i stap long Kavieng i go bek long sip MV Pakoris, ol dinghy na autobot mota bot bilong gavman.

NBC i kamap nupela

Esther Bralyn Wani i raitim

"NESENEL Brodkasting Kopresen (NBC) bilong Papua Niugini (PNG) i tok aut long nupela plen bilong mipela long karim aut Nu NBC i go long ol kastoma, ol seaholda, na ol tim memba bilong mipela. Dispela i bildim kalsa bilong mipela na senisim bisnis bilong mipela long gutpela bihain," Menesing Dairekta bilong NBC, Memafu Kapera i tok long Mande.

Mista Kapera i tok nupela plen bilong ol i makim ol kastoma. Em i tok nupela NBC bai karim aut laikim bilong midia i kamap laip long ol pipel na ol pikinini bai kamap bihain.

"Mipela i bungim olgeta pipel, ol save man na ol risos insait long wanpela Masta Bren, wantaim televisen (TV) o piksa bisnis we ol i bin kolim Kundu 2 pastaim," Mista Kapera i tok.

Em i tok ol i inves long Nupela NBC long neks tupela yia long karim aut nupela mining bilong bren, givim nupela strong na rait televisen na redio, mekim gut sevis na ol eksperiens wantaim strongpela sanel. Em i tok em i gutpela trutru PNG long husat i laikim ol tude, na long ol pikinini bihain.

Mista Kapera i tok, "Mipela i amamas long tokaut olsem NBC i opim nupela trutru PNG nius awa i stat long Mande 28 Septemba

wantaim nupela fomat, nupela taimslot, nupela taim na nupela nius meri, Antonia Singut."

Dispela nupela flegsip Nius Sevis bai kamap wanpela taim long TV na redio long wankain taim long olgeta redio netwok, bai go aut long 5 milien pipel husat bai harim long redio na lukim long TV.

Long wankain taim, Minista bilong Komyunikesen na Infomesen Teknoloji, Jimmy Miringtoro i tingim bek bipo long Independens taim NBC i save go pas long skulim ol pipel long Independens long 1973.

Minista Miringtoro i tok NBC i go het long karamapim ol bikipela ne-



Nupela brend-ing bilong NBC antap long wanpela bilong ol nupela bas bilong ol. UPNG Midia

senel iven i kamap long kantri na kamap wanpela rot bilong toksave long ol pipel long rurel o bus ples.

Tasol, Minista i tok no gat inap mani i bin kam long gavman we i bin lukim ol infrastraksa i bruk na go olupela.

Em i tok long Februeri 2013, em i sainim tripela projek bilong NBC

wantaim Praim Minista Peter O'Neill.

Dispela ol projek em, riabilitesen bilong ol provinsenal redio stesen, distrik rolaut bilong TV na na lons bilong nesenel yut FM, Tribe FM.

Em i tok ol i no fandim ol dispela projek yet i kosim K370 milien.

PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

Avoid heart disease, don't be a victim! Protect yourself!

To mark World Heart Day, 29 September 2015, the World Health Organization and World Heart Federation are putting a spotlight on creating heart-healthy environments. Whether it is home, work or play, you need to take control of your heart and keep it fit and strong for a long time to come! This is the perfect day to quit smoking, get exercising and start eating healthy – all in the name of keeping your ticker in good working order.

The World Heart Federation have found that heart disease and strokes are the world's leading cause of death, killing 17.1 million people every year – that's more than victims of cancer, HIV and AIDS and malaria. Overeating, lack of exercise, unhealthy diets, high blood pressure, cholesterol and glucose levels are all factors which can trigger heart disease and threaten our lives and those of loved ones. **World Heart Day** was set up to drive home the message that heart problems can be prevented especially through screening and lifestyle modification programs.

In the short time that PIH has inaugurated the country's only Cardiac Operation Theatre and Cath lab, Dr. OP Sharma, Medical Director and Chief Cardiothoracic and Vascular Surgeon at PIH says, "I have operated on patients from the Highlands to the islands including Rabaul, Madang, etc. In PNG, Coronary artery disease [heart artery disease] starts at a very young age. I have recently operated upon a 37 yr old man and of the 8 patients operated for open heart surgery, 6 have been less than 50 yrs of age!" Dr. Amyna Sultan OBE, CEO at PIH says "The increase of heart disease in comparatively young age group is due to smoking, unhealthy lifestyle, lack of exercise, uncontrolled blood pressure and diabetes. Out of all these, smoking, soda consumption, eating heavy fat laden foods such as lamb burlaps, skin from poultry, prawns, other red meats and high usage of salt are among the main culprits besides lack of exercise."

According to Dr. Sharma, "Anatomically the size of the artery [blood vessel] in a PNG citizen is very good compared to similar age counterpart in a developed country. In my last 10 months of practice in PIH, I have noticed that heart attacks are experienced here almost a decade and a half before when compared to the western world, especially due to poor lifestyle habits and also as the nature of disease seen here is very aggressive."

At PIH Cardiac Centre, we cover the spectrum of cardiac specialities from Clinical Cardiology to Interventional Cardiology doing heart angiography and heart angioplasty to open heart bypass surgery, valve replacements, vascular surgeries, etc. We have state-of-the art cardiac cath lab to perform heart angiography and a well equipped world class cardiac surgery operation theatre. Our team comprises of resident cardiac surgeon, cardiac anaesthetist and cardiac OT and Intensive care unit trained staff to cater to the needs of people in PNG. Our resident cardiologist is Dr. Ronald Galicio and the cardiac surgery team is led by Dr. OP Sharma, Chief Cardiothoracic and Vascular surgeon and Medical Director. The Chief Cardiac Anaesthetist Dr. Vandana Sharma who is also the Cardiac Incentivist also manages cardiac surgeons post-operatively. Visiting cardio-thoracic surgeons from Australia



Dr. OP Sharma explaining to the TV networks the images from an angiogram. Listen to Dr. Sharma every Wednesday night at 8.15pm on NBC 90.7 FM.

Dr. Richard Chan and Dr. Vineet Sankala add to the team's expertise, once every week.

As a gesture of goodwill and to enhance quality of life in fellow citizens, PIH is offering a healthy heart check for **K100 only** from 29th Sept to 15th Oct. This package includes 1 doctor consultation, blood pressure check, ECG, Cholesterol check and height and weight check. For appointments/enquiries please call 70296170.

Pacific International Hospital (PIH) is the largest and only private hospital providing the most advanced tertiary healthcare services in Papua New Guinea (PNG). The New Pacific International Hospital at 3 Mile was formally inaugurated on February 13, 2015, by Prime Minister Hon. Peter O'Neill. On May 25, 2015 PIH opened its new facility to the public and relocated from its earlier premises at 4 Mile to the new 3 Mile hospital. The 80-bedded hospital is spread across 8000 sqm area with excellent infrastructure. PIH houses 15 specialty clinics, 6 Emergency beds, 7 ICU, 2 CT ICU, 2 NICU beds, 4 operating theatres and PNG's only cardiac cath lab and dialysis unit. The ultramodern imaging suite includes PNG's first and only MRI, CT scan, digital x-ray, ultrasound and mammography unit. PIH's multinational staff brings with them years of expertise from around the globe and has strong corporate governance instituted by the PIH board headed by Sir Moi Avei. The senior management team comprises of professional talent from across the globe. Under the directions of acting CEO Dr. Amyna Sultan OBE, the hospital is looking

Dr. OP Sharma and Dr. Galicio of PIH with patient Clive Pole, who is only 37 years old and had two blocked arteries which Dr. Sharma operated on successfully.



forward to continually advance into new fields of healthcare that have been previously unavailable to the people of PNG.

Emergency Service Offered

- 24/7 Ambulance Services
- 24/7 Emergency Room
- 24/7 Emergency Trained Staff
- 24 hrs Diagnostics- Multidisciplinary Laboratory
- 24/7 Imaging Suite
- 24/7 Operating Staff

Flagship Departments at PIH

- Cardiology and Cardiothoracic Surgery Service
- Emergency and Critical Care Service
- General and Laparoscopic Surgery Service
- Ophthalmology and Optometry Service
- Urology and Nephrology Service
- Obstetrics and Gynaecology Service
- Orthopaedics and Orthopaedic Surgery Service
- Paediatrics and Neonatology Service
- ENT Service
- Dental Service
- Family and Internal Medicine Service

Other Services Offered

- Imaging Centre Service
- Lab and Blood Bank Service
- Health Checks and Wellness Service

WORLD HEART DAY, 29 SEPTEMBER 2015

GET HEART-SMART AT PIH!

GET A HEART CHECKUP FOR 100 Kina* ONLY (up to October 15th)

- Doctor Consultation
- ECG
- Cholesterol Check
- Blood Pressure Check
- Height and Weight Check

40% DISCOUNT ON ANGIOGRAM

Call 7029 6170
or text 7155 8866



Ol pipel i stap insait long dispela trening.

USAID i trenim ol Mangro Kabon akaunten

YUNAITET Stet (U.S) Ejensi bilong Intanesenel Developmen (USAID) na U.S Fores Sevis (USFS) i trenim 30 manmeri i makim gavman na sivil sosaiti olsem ol kabon akaunten long las wik.

Dispela trening long Mangro Kabon Akaunting bilong Papua Niugini (PNG) na Fiji bai bildim spes na save gut long ol bikipela

wok bilong ol mangro insait long klaimet senis mitigesen, ol tingting bilong fores kabon akaunting, bungim data long fil, sekim data bilong kalkuletim kabon.

Intanesenel Yunien bilong Konsevesen bilong Netsa (IUCN) aninit long Mangro bilong USAID Rihabilitesen bilong Sastenebel-Menes ol Helti Fores (MARSH) program. Ol kabon akaunten i

kisim trening pinis bai go het long givim sapot long ol wok bilong Nesenel Fores Inventori.

Ol pipel i stap insait long trening em ol lain long PNG Opis bilong Klaimet Senis na Developmen, PNG Fores Atoriti, Yunivesiti bilong Papua Niugini (UPNG), Nesenel Fiseris Atoriti (NFA), ol sivil sosaiti grup na Yunaitet Nesens Kolaboretiv Program long

Ridyusing Emisen long Diforestesen na Fores Digresen insait long ol Dveloping Kantri (UN REDD).

Embeseda bilong U.S, Walter E. North i joinim Joe Pokana bilong Opis bilong Klaimet Senis long opening bilong trening.

Embeseda North i tok, "Larim olgeta diwai i kaun. Plenet bilong yumi i stap long birua long klaimet senis. PNG I gat 70 pesen bilong ol

Pasifik Ailan Mangro eko-sistem."

Dispela MARSH projek bilong tripela yia, em \$3.7 milien agrimen namel long USAID na IUCN, wanpela pablik intanesenel ogenaiesen.

MARSH i save helpim long tokaut long ol nogut hevi bilong klaimet senis we i daunim diforestesen na fores digresen na strongim komyuniti bai stap gut gen.

Ol sumatin long Kutubu i stap insait long MMDYC



Tupela sumatin i sanap namel wantaim ol wokman bilong Exxon Mobil PNG.

LONG namba wan taim, tupela sumatin long Kutubu Sekenderi skul bai makim skul bilong tupela na stap insait long namba 8 Maik Maning Demokrasi Yut Kemp bilong Transperensi Intanesenel (TIPNG) long Lae, Morobe provins.

Tupela sumatin, Bill Buri na Silvia Maseni i stap namel long narapela 55 yut long 26 skul long kantri we ol i makim ol long stap insait long Maik Maning Demokrasi Yut Kemp (MMDYC) long Okari Konprens Senta long 18 inap 27 Septemba.

ExxonMobil PNG (EMPNG) i sapotim dispela program inap 2010, na dispela yia em i givim K50, 000 long helpim dispela Yut Kemp.

MMDYC i save makim ol sumatin long Gret 10 na 12 i stap namel long 16 na 21 krismas, em i save makim long kamapim wanpela bikipela level bilong integriti, daunim korapsen na no gut gavanens long sosaiti.

Eksekutyutiv Dairekta bilong TIPNG, Emily Taule, i tok olsem dispela iven i lukluk long ol ikononik, politikel sains na midia. Em i save go aut long ol bikipela wokso, ol presentesen, ol skil bilding sesen na lidasip lukluk.

"Insait long MMDYC ol pipel husat i stap insait bai lainim ol namba wan lo bihain long demokrasi na gutpela gavanens na bai ol i ken karim aut ol pasin bilong pasim ol lo na karim aut

ileksen," Mis Taule i tok.

"Em i bikipela samting long ol yangpela pipel long kamap gutpela sitisen, long kain taim olsem na long kamapim dispela mipela mas eduketim ol long wanem ol i ken mekim," em i tok.

Long wankain taim, Menesing Dairekta bilong EMPNG, Andrew Barry i tok olsem ExxonMobil PNG i promis long apim bikipela stended bilong integriti long olgeta operesen na i amamas long wok bung wantaim TIPNG na ol ektiviti bilong en.

"Dispela em olsem inves na sapotim ol program olsem Maik Maning Demokrasi Yut Kemp i lukluk long ol program bilong ol yangpela lida bilong bihain," Mista Barry i tok.

PNG disainim ol font i op

OL pipel long Papua Niugini (PNG) bai gat sans long yusim ol font o taip-fes we ol i mekim long PNG bai kamap long sotwe pekes.

Dispela nupela prodak ol i disainim na divelopim yusim ol kainkain samting long kalsa bilong PNG we ol Ats na Disain Strend bilong Yunivesiti bilong Papua Niugini (UPNG) i bin opim long Fraide, Septemba 11.

Prodak ol i kolim Kumul Fonts (KF) we pastaim ol i bin kolim Fentesi Font (FF) i kamap olsem wanpela projek we Strend i laik promotim kalsa bilong PNG insait long modenaisesen o kain stap bilong tude long ol samting bilong kalsa na salim go aut long wol.

Kumul Fonts i save kamap long alphabet (ol leta), numerik (ol namba) na ol simbol o sain fom i disain wantaim tingting long promotim at bilong PNG insait long moden o nupela teknoloji, promotim nupela ol stail long at na yusim ol samting bilong kalsa bai helpim long mekim ol kalsa i stap na i no inap pinis.

Man i painim dispela projek na leksera long



At na Disain, Philemon Yalamu, husat i disainim o kamapim na divelopim ol fonts i tok olsem em i mekim dispela at wok taim em i yusim ol kainkain kalsarel bekgraun bilong ol sumatin bilong em.

Ol sumatin i bin mekim tu na ol i bin kamap wantaim wok long givim ol disain long ples bilong ol long kamapim wan wan karekta set. "Mi wanpela man mi save laik long yusim ol samting mi yet mekim long stail bilong mi. Mi no save laik long yusim ol samting ol narapela pipel i save mekim," Mista Yalamu i tok.

"Ol pikinini bilong mi, wanpela gat 12-pela krismas na narapela gat 10-pela krismas, husat i save smat tru long kompiuta i givim mi ol dispela tingting. Bikipela pikinini bilong mi em i save gut long mekim ol program na liklik pikinini i stap wantaim disabiliti. Em i save hat long muv long strong bilong em yet tasol, em i save yusim lek bilong em long ol

kainkain gutpela samting long kompiuta bilong em olsem ol bikipela lain save mekim long kompiuta. Tupela wantaim i smat tru long kompiuta, na dispela i mekim mi kamap wantaim nupela tingting, wanpela orijinel samting," Mista Yalamu i tok.

UPNG Buksop bai kamap namba wan pablisasi na promoti bilong dispela dijital pablisasi i bin go pas long sponsaim dispela opening.

Long wankain taim, Menesing Dairekta bilong UPNG Buksop, Dokta John Evans, i amamas long dispela prodak we bai stap long maket na em i namba wan kain samting long indastri.

"Dispela em i nupela samting long Yunivesiti, olsem wanpela akeademik long kamapim kain samting we Yunivesiti bai pablisim bilong ol pablik long yusim," Dokta Evans i tok.

Mista Yalamu i amamas long sapot bilong ol sumatin long redim dispela opening em i laik lukim planti kain pasin bihain long yunivesiti.

Globeathon em i wokabaut bilong gutpela laip

Frieda Sila Kana i raitim

WOKIM ekseis em i gutpela long bodi bai stap helti na ol pipel bai amamas long stap longpela taim long graun.

Dispela em i bikpela toktok we Gavana bilong Nesenel Kapital Distrik, Powes Parkop wantaim meri bilong Paim Minista, na PNG Kensa Faundesen Embeseda, Linda Babao O'Neill na ol dokta bilong Pasifik intenesenel Haus sik long Pot Mosbi i bin mekim pastaim long bikpela wokabaut ol i kolim globeathon i kamap long Sande 27 Septemba.

Gavana Parkop i tok ol pipel bilong Papua Niugini i mas senisim tingting bilong ran long painim marasin long taim sik i kamap long bodi na ol i mas tingting long pasim rot bilong sik pastaim long em i kamap.

Dispela toktok em i mekim long stat bilong Globeathon, wokabaut bilong kamapim save bilong ol birua i stap long ol sik kensa long ol meri.

"Kensa em i rabis sik. Kasen brata bilong mi yet i bin kisim dispela sik long las yia na em i dai. Ol meri save kisim sik kensa na ol i save bungim planti hevi. Ol dokta i save mekim wok bilong ol long helpim tasol yumi ol pipel yet i mas mekim sampela samting long helpim yumi yet long no ken kisim ol dispela sik," Mista Parkop i tok.

"Lukautim yu yet, wokim ekseis na kam wokabaut wantaim mi long olgeta Sande moning. I gat 10,000 pipel husat i no save kisim bikpela mani tumas na i ting ol bai no gat mani inap long kisim marasin o lukim ol dokta olsem na ol i save wokim ekseis wantaim mi long stap helti," Gavana Parkop i tok.

Long wankain taim, meri bilong Paim Minista na Embeseda bilong PNG Kensa Faundes (PNGCF) i stap makim maus bilong ol PNGCF menesmen na bot na i tok, dispela Globeathon em i bilong kamapim luksave long seaike kensa olsem em i namba wan long kilim ol meri long PNG.

"Ol meri i save kisim ol sik kensa bikos long ol kain laipstail no gut na ol samting ol i save kaikai na pasin ol i save mekim long bodi bilong ol yet. Mi laikim yumi ol meri i mas lukim dokta long sekim yumi olgeta taim. Yumi mas lainim yumi yet long ol rot bilong abrusim ol birua bilong sik kensa," Mis Babao O'Neill i tok.

Bikpela rekot namba blut ol volantia i givim nating

EXXONMOBIL PNG (EMPNG) hetkwata opis long Pot Mosbi i bin lukim 86 volantia man-meri i kam givim blut bilong donetim we ol i bin kisim 70 bek blut i winim olgeta rekot bilong pastaim.

CBD kodineta, Anna Megueria i tok blut benk i save sot long blut planti taim, bikos kantri PNG i save bungim olsem 20 pesen bilong ol blut olgeta yia em i save kam long ol lain ausait i givim fri

"Namba bilong ol blut i save sot tru long taim ol hai skul na ol koles i save pas long taim bilong skul holide na long kain taim

mipela i laikim moa kopret oge-naisesen na ol wokman na wokmeri bilong ol long donetim blut," em i tok.

"Blut em no gat man inap long wokim long fektori. Em bai i kam long gutpela bel bilong ol volantia dona tasol na mipela tok tenkyu EMPNG long donesen bilong ol i kam long taim stret."

Planti taim ol lain husat i laik givim blut i save diskwalifai bikos ol i no gat inap ain long blut bilong ol, moa long ol meri olsem na long luksave long dona blut i mas stap gut na inap long sevim planti moa laip, ol volantia i mas kaikai gutpela

balens kaikai helt i kaikai na ol kaikai i gat planti ain long ol olsem ol mit i no gat planti gris, kiau bilong kakaruk, brokoli, poteto, resin na melen.

Ain em i gutpela samting insait long kaikai we i save helpim long planti wok bilong bodi olsem long karim oksijen o win insait long blut i go long olgeta hap bilong bodi.

EMPNG Menesing Dairekta, Andrew Barry i tok laip bilong ol pipel bai seiv wantaim ol blut i kam long ol volantia husat i givim wantaim bel bilong ol.

"Mipela amamas tru long helpim dispel gutpela wok bi-

long senisim laip bilong ol nara-pela na mipela tenkyu long ol dona bilong blut long givim nating blut bilong sevim laip," Andrew i tok.

Enuel CBD em i wanpela wok bilong Pot Mosbi Jeneral Haus sik (PMGH) na em i save go long ol kopret komyniti, long ol i givim blut long blut benk saplai.

Long las yia CBD i bin kisim inap long 1200 bek blut long ol kampani long ealain, otomotiv na ol profesenal sevis.

Ol bek blut ol i kisim bai go long blut benk na bai ol i givim i go long ol haus sik insait long kantri.



Givim blut, wanwan drop blut em i gat namba. Meneising Dairekta bilong ExxonMobil Andrew Barry, i givim blut wantaim long sevim wanpela laip na CBD Nasing Opisa, Eddie David i stap long helpim em.

Ramu NiCo Baim Nupela ROV long Kisim Rekot Aninit long Solwara

RAMU NiCo i baim wanpela kain spesel masin blong wok aninit long solwara long helpim kampani long sekim ol pipia we em i rausim i go daun long solwara na givim ripot i go long Gavman na ol arapela stekholda.

Kampani i baim dispela rimot operating masin (ROV) model bilong en vLBV300-5 long wanpela kampani ol i kolim SEABBOTIX Ltd bi-hain long ol saveman na saintis i tokim kampani long yusim ROV long wok bilong en.

Dispela masin blong wok aninit long solwara na kisim ol piksa na ripot em gutpela tru na i ken wokim planti wok na givim ripot i go bek isi tru.

Em i ken statim wok bilong en stat long miksing tenk bilong dip si teilings plesmen (DSTP) bihainim paip na go aninit long solwara long 150 mita mak, na tu em i ken go

daunbilo tru long plua bilong solwara we ol pipia i go sin-daun long en.

Dispela nupela ROV em ol wokman i ken kontrolim long graun na em bai mov i go daun olgeta long solwara na kisim ol piksa na rekotim long bokis kompiyuta em i karim. Wanem ol piksa na data ROV i kisim aninit long solwara em bai bringim i go antap na ol wok lain bai kisim long wanpela disk na kisim ol rekot long en.

Ramu NiCo i tokaut olsem taim i gat gutpela rekot long sait long DSTP em bai givim gutpela ripot i go long Nesenel Gavman na tu lokal komyniti long Raikos distrik na tu kantri.

Pastaim long Ramu NiCo i baim dispela ROV, kampani save yusim ROV i kam long ovasis long olgeta kwata long wan wan yia long sekim wok bilong DSTP.



OL HSE lain Long Madang husait i save wok glasim OEMP we DSTP i kam ananit long em.

Ol ripot na poto long namba 5 Pasifik Tuna Konprens long Sofitel Hotel, Nadi long Fiji wantaim Veronica Hatutasi

Gren koalisen bilong lukautim envairomen na tuna long Pasifik rijon

WANPELA long ol tingting we Namba 5 bikipela bung bilong tuna fiseris long Pasifik i bin mekim em long ol Pasifik kantri i fomim o kamapim wanpela gren koalisen long lukautim gut envairomen na sevim long ol tumbuna i kam bihain i ken yusim tu.

Minista bilong Fiseris, Mao Zeming i bin wokim dispela tok-tok long Pasifik Tuna Forum o bikipela kibung i bin kamap long Sofitel Hotel, Denarau long Nadi, Fiji long las wik.

Em i tok i moabeta long ol gavman bilong ol liklik ailan Pasifik kantri long putim dispela long fran bilong ol ajenda bilong ol.

Em i tok yumi mas developim fising indastri na menufeksaring o kamapim ol samting wantaim ol prodak bilong yumi yet olsem tuna pis long ol kantri insait long rijon bilong yumi yet.

“Ol arapela kantri long wol i no ken ting olsem ol Pasifik Ailan kantri bai larim ol i yusim ol nupela sip wantaim ol nupela teknoloji long kisim ol pis long solwara bilong yumi long Pasifik na kisim i go long ol kantri bilong ol na prosesing ol ausait o ovasis.

“Yumi laik painim pis na divelopim ol fising bisnis, yumi laik kirapim ol tuna prosesing bisnis long prosesim tuna. Yumi gat ol liklik ikonomi na liklik sans long wok, tasol bikipela solwara na planti tuna pis i raunim yumi.

“Olsem na em i bikipela samting long givim sans long ol Pasifik Ailan long go insait long wol ikonomi taim ol i go long ol fising ventja na tu, long wok bilong tuna prosesing,” Minista Zeming i tok.

Em i tokaut gen olsem toktok



MEKIM SAMTING NAU: PNG Fiseris Minista, Mao Zeming na Fiji Fiseris na Fores Minista, Osea Naiqamu wantaim ol arapela bikman na meri i sindaun na harim ol toktok long bung.

we em i bin mekim long Pasifik Ailan Forum bung long Mosbi long las mun long ol Pasifik Ailan kantri i wok bung wantaim long strongim na go insait long ol wanwan level bilong velyu sen long tuna fising na prosesing indastri.

“Taim yumi bihainim dispela rot, yumi ken kamapim sans bilong kamapim wok long ol pipel bilong yumi long bot bilong painim pis, prosesing plent, maketing o bisnis eksekutiv.

“Yumi ken kamapim sans long kantri bilong yumi i kisim moa foren eksens mani. Yumi ken kamapim ol sans long ol wok invesmen na sapotm ol infrastraksa samting,” Minista Zeming i tok.

Minista Zeming i bin amamas na luksave long sapot bilog PNG tuna indastri na ol gavman ejensi na ol stekholda grup i makim ol ogenaísesen bilong ol long dis-

pela forum.

Em i bin tok tenkyu tu long gavman na ol pipel bilong Fiji long gutpela lukaut na pren pasin ol i soim long PNG delegeesen i go long naispela ples bilong ol na stap insait long dispela tuna forum bung.

Long wankain taim tu, Fiji Minista bilong Fiseris na Fores, Osea Naiqamu, i tok tuna em i bikipela risos long dispela rijon (Pasifik) na bikos long tuna risos tasol, ol Pasifik Ailan kantri i bin bung wantaim na kamapim Pasifik Ailan Forum Fiseris Ejensi long 1976.

Em i tok tuna risos i gutpela abus long ol pipel bilong yumi, kalsa na kain laip bilong ol liklik ailan komyuniti.

Minista Naiqamu i tok taim yumi luksave olsem yumi mas serim dispela risos wantaim ol narapela kantri long wol, bikipela samting em ol Pasifik Ailan kantri

na ol lain i painim pis long ol wara bilong yumi i wanbel long bihainim ol rot bilong painim pis we bai no pinisim ol tuna pis, tasol lukautim dispela risos na em bai stap long yusim long bihain taim tu.

Em i tok long ol ripot bilong ol rijonal menesmen ogenaísesen bilong yumi, bikipela ai tuna pis i wok long pinis bikos long ova fising, na klostu yelofin tuna bai bungim hevi tu.

Minista Naiqamu i tok wanpela ripot we Wol Benk i karimaut i no long taim i go pinis i soim olsem velyu bilog tuna ol i kisim long rijon bilong yumi i stap long US\$2.4 bilien.

“Askim yumi mas mekim em, wanem mak long dispela velyu rijon bilong yumi i kisim, bai yumi salim ol rait bilong yumi long kisim ol tuna pis o bai yumi bai sapotim ol pipel bilong yumi, ol indastri long go insait long fising bisnis.

“Olsem wanem long prosesim ol tuna ol i kisim long rijon bilong yumi na rot we ol Pasifik Ailan kantri , olsem ol papa bilong risos i ken go insait long fising, prosesing na tred bilong tuna risos,” Minista Naiqamu i bin tok.

Taim em i luksave long ol salens wol i bungim tude long wol tuna fising indastri we planti i no kisim inap tuna, baim ol bikipela fi long kisim tuna pis na salim long liklik mani bikos wol tuna prais nau i no gutpela.

“Ating em i taim nau yumi wokim sampela senis long namba bilong ol bot bilong ol ovasis kantri i panim pis long rijon bilong yumi,” Minista Naiqamu i tok.



SAIN BOD: Sain bot i soim Pacific Tuna Forum 2015 i bin kamap long Sofitel Resort Denarau, Nadi, Fiji.



MERI GRUP: Ol meri grup i karim ol presen long pinisim bung seremoni.



FFS BIKMAN: Tripela bikman bilong Forum Fiseris Seketeriet i serim sampela ol tingting.



LAUTOKA MAKET: Mama Mareta Dadea wantaim ol taro, na kumu em i salim long Lautoka maket. Em i maket nau long 6-pela yia. Mani em i kisim i helpim em long skul fi na lukautim famili. Man bilong em i stap long Fiji ami we i wok long Midel Is Pis kipping fos long Lebanon.

Amamas long bung i go gut

PASIFIK Tuna forum i bin ran gut na ol lain i bin stap insait i amamas long tupela de bung na toktok long kamapim ol wok bilong tuna divelopmen, menesmen, lukautim gut long bihain taim na tuna prosesing insait long rijon yet.

Ol konprens siaman, Phil Roberts em Menesing Dairekta bilong Tri Marine International Limited long Singapore, na Profesa Glen Hurry em Patna long

MRAG Asia Pacific, Australia i tok ol bung toktok i bin gutpela we ol deleget i gat sans long askim kwesten, autim tingting na kontribut gut long forum.

Tupela bikman i tok bikipela samting we bung i bin toktok long en em profitebol sastenebel menesmen bilong tuna indastri, kos na haves bilong tuna, velyu bilong fiseris long ol Pasifik kantri na rot ol i menesim tuna long bihain taim.

“Yumi mas was gut long tuna stok bikos sapos yumi kisim kisim i go na yumi pinisim ol, dispela bai i no gutpela,” Profesa Hurry i tok.

Em i tok ol bikipela pilaia em PNG, Fiji na Solomon Ailan na mesej i go long ol gavman bilong ol em long fokas moa long ikonomik divelopmen bilong tuna indastri olsem tul bilong ikonomik divelopmen.

ENTATEINMEN: Wanpela long ol asples grup i pilai long amamasim ol lain long bung.



PNG kisim salens

SALENS i kam long ol PNG deleget long Pasifik Tuna Forum long helpim ol bai givim long kantri bilong ol na rijon long menesim gut ol tuna risos.

Deputi Seketeri bilong Fiseris na Fores long Fiji, Sanaita Naqali i wokim dispela salens long pinis bilong bung long las wik Trinde long Sofitel Hotel, Nadi long Fiji.

“Bai yupela i kisim wanem samting i go bek.

“Mi strongim na salensim yupela ol PNG deleget wanem samting yupela i kisim i go bek long helpim rijon long lukautim na menesim gut tuna indastri,” Mista Naqali i tok.



KAVA SEREMONI: Long pasim bung, ol asples Fiji lain i wokim tumbuna kava seremoni.

Olgeta meri mas wokim helt sekap olgeta taim



Dokta Mathias Sapuri holim wanpela bokis marasin bilong banisim ol yangpela meri long ol i no ken kisim sik kensa – Gardasil.

Kokoda Trek i sapotim gutpela helt na edukesen



Ol komyuniti wantaim gavman i opim ol nupela haus bilong givim edukesen na helt sevis long Kokoda Trek.

OL pipel bilong Manari long Kokoda Trek i selebretim tupela nupela haus i pinis wantaim helpim bilong Kokoda Inisetiv long bringim gutpela sevis long komyuniti bilong ol.

Ol lain i makim Kokoda Inisetiv, Kokoda Trek Atoriti, Dipatmen bilong Edukesen, Hiri Distrik Helt Edministresen na Australia Hai Komisen i bin bung wantaim ol pipel long dispela komyuniti long opim ol tupela nupela haus.

Ol i bin kirapim tupela nupela haus bilong ol wokman bilong edukesen na helt, 6-pela toilet na klinpela hap bilong kisim wara wantaim mani, i kam long Australia aninit long Kokoda Inisetiv.

Alecks Wageri, Het Tisa long Manari Praimeri Skul, i tok ol nupela haus bai helpim long edukesen, na bai makim ol

nupela tisa na tu long holim olupela tisa na ol helt wokman long stap na helpim komyuniti.

“Long dispela taim, i gat tripela praimer skul tisa long Manari Praimeri Skul husat i save kisim tupela o moa gret long klas bilong ol. Wanpela nupela haus tisa bai mekim ol i lukim wanpela moa nupela tisa long kam na ol sumatin bai lainim gut moa long skul. I gat 109 sumatin long dispela skul,” Mista Wageri i tok.

“Ol Australia na PNG Gavman i tok olsem ol bai sapotim long kamapim gutpela edukesen na helt sevis long Kokoda Trek rijon. Long kamapim dispela, mipela i wok patna wantaim olgeta level bilong Gavman na komyuniti,” Rod Hilton, Minista Kaunsela bilong Australia

Hai Komisen i tok.

“Em i gutpela tru long wok wantaim ol pipel bilong Menari long sanapim ol dispela haus we bai helpim tru ol komyuniti,” em i tok.

Bai i gat moa infrastraksa i go long ol komyuniti bilong Kokoda Trek rijon insait long ol mun i kam yet. Insait long Julai 2015, Australia na Papua Niugini i pinisim wok bilong bringim 240 tan samting bilong wokim haus bilong edukesen, helt, wara na senitesen bilong ol komyuniti long helpim planti tausen pipel.

Kokoda Inisetiv em i wanpela wok bung namel long Australia na Papua Niugini long lukautim Kokoda Trek, Braun Riva Ketsmen na Owen Stanley Range rijon, na long kamapim gutpela kwaliti bilong laip long ol komyuniti long hap.

Frieda Sila Kana i raitim

DOKTA Mathias Sapuri, wanpela namba wan dokta bilong ol meri long kantri i gat bikpela wari olsem kensa sik long ol meri i wok long go antap yet, olsem 3,000 olgeta yia.

Em i singaut long olgeta bikpela na ol yangpela meri long ol i mas painim rot i go long haus sik na askim sekap long olgeta tri mun samting.

“Mipela i gat olgeta kain rot bilong stopim sik kensa i stap. I gat ol tok-save, tok skul, ol we bilong stopim na tu long kisim tritmen o marasin na tok stia long ol dokta i stap,” Dokta Sapuri i tok.

Dokta Sapuri i bin mekim dispela toktok long wanpela bung wantaim ol midia long las wik pastaim long bikpela “PIH Globeathon Wok-about” bilong kamapim save bilong birua i stap long ol sik kensa we i save kilim planti meri long wan wan yia.

Dokta Sapuri i tok nau i gat olgeta rot bilong sekim ol meri sapos ol i gat binatang we i kamapim sampela kain kensa olsem, susu kensa, sevaikel kensa, ovari kensa o kensa long bilum bilong bebi. Em i tok, i gat masin olsem CT Sken, Pap Smia, Mamogram i stap bilong sekim ol meri taim ol i lukim sampela kain senis long bodi bi-

long ol.

Wanpela marasin tu i stap bilong stopim ol long no ken kisim dispela binatang bilong kensa. Nem bilong dispela marasin em Gardasil we ol yangpela pikinini meri krismas bilong ol 9 yia i go long ol bikpela meri husat i gat 26 krismas inap long kisim long sut na em bai pasim rot bilong ol binatang long kamapim sik kensa long bodi bilong ol.

“Long taim PIH i stat long yusim dispela vaksin o banis sut, mipela i lukim olsem em i wok tru. Long dispela ol meri bai kisim tripela taim bihainim taim ol dokta i makim. Tasol nau tu em ol meri inap long kisim banis marasin wanpela taim tasol na i no inap tromoi bikpela mani tumas,” Dokta Sapuri i tok.

Em i tok moa olsem gavman i mas tingting long putim dispela vaksin i go long nesenel vaksin program na wokim wanpela bikpela vaksin long olgeta meri na bihain ol i ken mekim bilong wan wan meri. Em i ting olsem insait long wanpela yia gavman inap long putim K1.2 o K1.5 milien long givim aut dispela banis marasin long ol meri.

Tasol Dokta Sapuri i tok bilong daunim sik kensa tu i gat ol marasin i stap na i gat kemoterapi i stap. Wanpela samting

tasol i no gat em long redioterapi. Em i tok i gutpela long kantri i mas gat tupela redioterapi masin long stretim sik bilong ol lain i kisim sik kensa, ino long ol meri tasol.

Bikpela samting long olgeta pipel long save em olsem kensa em i wanpela kain sik bilong kilim man isi tasol. I gat 4-pela kain sik kensa nau i save kilim ol meri long kantri em sevaikel kensa, susu kensa, ovari kensa, kensa long bilum bilong bebi long bel bilong mama.

Dokta Sapuri i tok, dispela Globeathon em bilong kirapim tingting bilong ol manmeri long luk-save long ol kain sik kensa i stap aninit long ples bilong putim let long bel.

PIH i holim pinis tripela Globeathon na dispela nau em i namba 3 yia long holim. Dispela globeathon em i bikpela samting biko s em i givim sans long sapotim dispela pait bilong daunim sik kensa.

Globeathon yet em i wanpela intenesenel wokabout na em i save kamap long 100 kantri long wol. Ol i save painim wanem kain bikpela institusen long kantri i gat olgeta samting long holim dispela kain wokabout na ol i save makim.

Na PIH em i gat olgeta samting long holim wanpela globeathon olsem na ol i makim em long i go pas long dispela wokabout.



Yut, Meri na Famili
Pastor
Barbara Lunge

YUMI kalapim tupela lain tasol yumi no lukim long ai

Namba wan long 13 Septemba 2015 bilong Israel 70 yia bilong stap long kalabus nau ol i go fri na yumi stap long Jubili Yia bilong selebresen.

PNG tu i lukim 70 yia long 13 Septemba 1945 taim Jeneral bilong Ami bilong Siapan i givim em yet long ol Australia na Amerika ami long Wom, Wewak bilong Is Sepik Provins. Ol i planim em taim em i stap laip yet bikos em i lus long pait.

Birua bilong yu em yu planim pinis na yu kalapim matmat bilong em aninit long lek bilong yu. Ritim Jere-maia 29:10-13 na Wok Pris 25.

Presim baten gen na statim olgeta samting nupela gen. Ol wokman nating i go fri, rausim ol dina, graun i stap nating na tripela yia bilong God i givim samting long ol.

Namba tu lain we ai i no lukim em 40 yia bilong yu kamap bikpela man. Long kalapim Jodan Wara bilong Tait Wara bilong Holi Spirit Rivaivel long go insait na kisim ol gutpela samting bilong yu. Ol ston we yu apim na karim em ol presen bilong yu bilong 7-pela maunten we bipo birua bilong yu i bin holim.

Ritim long Josua sapta 1 na 4 na 5 na 6. Taim yu mas i go aut, larim Judah o Preis i go pas na yu bihainim em.

Jas 1:2, Buk Song 68:1-3, “Larim God i kirap na ol birua bilong em bai ranawe nabaut; 2 Stori 20:22 Bai yu winim birua bilong yu taim yu lotu na presim God.”

PNG go insait na kisim samting we em i bilong yu stret!

Toksave: Sapos yu gat wari, tingting planti, yu ken ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. o ring long 79638276 o salim email long: lungeb37@gmail.com

Wimen long NGO na Spot bai go pas

LONG luksave olsem ol meri long olgeta profesenel wok i kisim prais, long dispela tupela nupela kategori i kamap long ol Westpac Outstanding Wimen (WOW) awat.

Dispela Moore Printing Spots Awat i bilong ol meri husat i hat wok na givim bikpela taim long bildim wanpela envairomen bilong spots long go

bikpela long PNG.

“Mipela i laik amamasim ol meri husat i save mekim planti wok long edministresen, developmen, o promosen bilong spot insait long PNG,” Jenerel Menesa na Dairekta bilong Moore Printing, David Doig i tok.

“Ol kain meri mipela i painim em ol meri gat gutpela save long spots edministresen na kosa

husat i save givim taim bilong em long kamapim senis na ol sans insait long komyuniti insait long developmen, edministrese, o promosen bilong spot.”

Wanpela awat i kamap bilong husat meri i no wok long kisim win mani sekta: Steamships i no bilong Win mani Awat. Steamships i kamap platenium sapota bilong WOW long 2012.

“Pastaim ol meri i savv wok long ol hap we no gat win mani mipela save makim ol long kain kain kategori, tasol mipela lukim dispela hap olsem planti gutpela meri i save hatwok long senisim kantri i save wok long hap. Ol i mas gat kategori bilong ol yet,” Jenerel Menesa bilong Kopret Afes bilong Steamships, David Toua i tok.

Gavuone Man Felosip i go wok misin long Alotau



Ol memba bilong Gavuone Yunaitet Sios Man Felosip wantaim ol meri bilong ol na sampela yangpela man.
Foto: Dennis Orere.

Dennis Orere i raitim

MINISTRI bilong ol yangpela mangi na ol bikipela man long Gavuone Yunaitet Sios long Abau Distrik, Sentral Provins (Is Papua Rijon bilong UCPNG) i bung long Alotau las wik long wanpela autris misin wok. Sampela bilong ol i bringim meri bilong ol wan-

taim long dispela wok misin.

Ol i bin wokabaut long ples i go long Boroko Yunaitet Sios long las wik we ol i stap tupela de pastaim long ol i lusim Mosbi na go long Alotau.

Long Alotau ol bai stap moa long wanpela wik, long Lele-hudi kongrigesen long Is Tawala Seket bilong Papua

Ailan Rijon bilong UCPNG. Dispela grup i tok tenkyu long Memba bilong Abau, Sir Puka Temu long em i helpim ol long baim tiket bilong ol wan we i go long Alotau na tu long helpim ol long sampela samting ol bai mekim long wokabout bilong ol.

Ol bai go bek long ples bilong ol bihainim solwara rot wantaim ol liklik bot.

Ol i tok tenkyu tu long ol wantok na famili bilong ol husat i stap long Pot Mosbi moa long ol Gavuone Eben Felosip long lukautim ol wantaim kaikai taim ol i bin wet i stap long Boroko Yunaitet Sios.

Moa long 50 man na meri i stap insait long dispela wokabout.

Namba wan nesenel konprens bilong ol Lutheran Pasto na evenjelis

Pasto Max Gende i raitim

Tupela i bilong Olgelbeng seket long ELC Hagen distrik. BiPO yet, Lutheran Sios i save holim Nesenel Pastos Koprens bilong ol pasto tasol, na i save kamap olgeta tupela yia.

Tasol long dispela yia 2015, long namba 11 konprens ol i kolim 'Nesenel Pasto na Evanjelis Konprens', tupela lain wokman wantaim i kamap long dispela konprens.

ELC Yabem distrik i lukautim dispel konprens long Makham Veli Sekenderi Skul kempas.

Moa long 1,500 ol pasto na evanjelis bilong Lutheran Sios i kam long olgeta hap bilong Papua Niugini, sampela i kam wantaim meri pikinini na famili, na planti ol ikam ol yet na bung wantaim long dispela bung long namnba wan taim.

Wanpela bilong ol em tupela strongpela evanjelis bilong Sios, Evanjelis John Pai na Evanjelis Pelagla Kauli.

Tupela i bilong Olgelbeng seket long ELC Hagen distrik.

Tupela i tok tupela i amamas tru long kamap long dispela konprens namba wan taim. long wanem, ol save olsem bipo yet, konprens em bilong ol pasto tasol.

Evanjelis John tok, "Mi gat



TUPELA EVANJELIS AMAMAS: Evanjelis John Pai na Evanjelis Pelagla Kauli bilong Ogelberg Seket long Isten Hailans i amamas long stap long bung.

bikipela amamas tru olsem nau ol senisim na konprens i stap olsem bung bilong ol

pasto na evanjelis bikos yumi olgeta i wokman bilong wanpela Sios, ELC-PNG.

ELC-PNG i nogat Tiolojikel Komiti

NAU yet, Evanjelikel Lutheran Sios long PNG (ELC-PNG) olsem wanpela bikipela sios long PNG na Pasifik, i nogat maus bilong toktok long ol bikipela sosel na tiolojikel isu i wok long kamap long kantri na kamapim wari long planti Kristen.

Het Bishop bilong Evanjelikel Lutheran Sios long Papua Niugini, Reveren Giegere Wenge i tokim Nesinel Pasto

na Evanjelis Konprens olsem sios nau i no gat Tiolojikel Komiti inap 5-pela yia samting.

Dispela em bihain long nupela Kknstitusen o mamalo bilong Sios i rausim dispela kain ol komiti bipo i bin stap.

Em i tok nau yet, PNG i gat bikipela salens long ol senis na developmen i wok long kamap.

Na em kamapim hevi long bilip bilong ol Kristen na

kwestenim posisen bilong sios long ol tiolojikel isu i wok long kamap nau olsem 'gay marriage' o man maritim man, na meri i maritim meri, KJV Baibel agenda, sanguma na marila, na ol arapela moa.

Bisop Wenge i tok, "Mi yet i no inap toktok, tasol sios i mas toktok olsem sios long tingting i kam long komiti i makim olgeta tiolojen long sios.

Na tu Bishop Kounsul tu nupela konstitusen irausim pinis. Olsem na dispela konprens i mas makim na strongim nupela Tiolojikel Komiti long adresim ol dispela bikipela isu long kantri."

Nau yet Konfrens i wanbel na bai kamapim dispela Komiti.

Moa long 1,500 pasto na evanjelis i stap long dispela konprens.



Wokabaut wantaim Jisas

STORI bilong wanpela yangpela mangi i gat 12-pela krismas na i stap wantaim mama bilong em. 12 yia. Papa i dai pinis.

Olgeta de, em na mama bilong em i save go long ples bilong tromoim pipia na painim samting inap long salim gen na kisim mani long en.

Long maus bilong pren bilong em, liklik mangi i harim olsem i gat wanpela king i save helpim ol rabis manmeri husat i save go lukim em. Tasol king i stap longwe tru. Ol i mas wokabaut long sampela de na kamap long ples bilong king.

Long nait em i stori long mama bilong em na mama i nogat laik long harim. **"Ol pren bilong yu i driman nating tasol. Ol i stap rabis olsem yumi na ol i laik wokim bikipela driman long mekim ol i amamas tasol".**

Narapela nait, pikikini i stori gen. Em i gat strongpela laik long go na lukim king. **"Mama! Mi laik soim olsem dispela stori i tru. Olsem na mi laik go lukim king. Sapos i no tru, em i orait. Taim mi kam bek, bai mi tokim ol pren bilong mi long stop giamanim ol manmeri.**

Hap tumora, bai mi stat long wokabaut i go long ples bilong King. "Mama, inap yu helpim mi long liklik kaikai na wara? Bai mi kaikai na dring long rot".

Moning tru, mama i kirap na redim kaikai na dring bilong boi. Em i wokabaut liklik na i lusim pikinini bilong em long rot.

Liklik mangi i taitim bun na wokabaut i go. Wanpela de, tupela de, na long de namba 5, em i kamap long get long haus bilong king.

Em i lukim planti strongpela man i sanap long get na sekim manmeri i go i kam. Olsem wanpela mangi bilong ples, em i surik tru. Em sindaun malolo, kaikai liklik kaikai na dring wara bilong em long i kisim strong na wokabaut i go long get.

Ol sekyuriti gad i no wari long em. Ol i ting em i wanpela **beggar o tarangu man i save askim long samting**, i wokabaut raun tasol. Mangi i go kamap long pes bilong gad na i tok: **"Mi laik lukim king!"**.

Gad i tokim em; **"Yu husat? Yu rabis na deti, smel na i no save waswas na yu laik lukim king? Yu ting king em i wanpela smel man olsem yu a?"**

Tasol boi i strong olsem na tokim ol: **"Mi bin lusim ples 5-pela de i go pinis...na kaikai na dring bilong mi tu i pinis. Mi laik lukim king nau!"**

Narapela gad i kam na krosim em bikipela moa yet na karim boi ya na tromoi em i go. **"Yu go...rabis pipia kaskas dog. Noken driman long lukim king."**

Em i kisim bikipela bagarap na krai i stap. No gat wanpela gad i lukluk long em. Em i kirap na wokabaut i go bek long ples. Em i krai long rot bikos kaikai na dring bilong em i pinis. Em i wari tru.

Tupela aua bihain, em i bungim wanpela yangpela man. Yangpela man i pilim sori long em. Em i askim: **"Bilong wanem yu krai?"**

"Mi laik go lukim king tasol ol gad i tok nogat. Wanpela bilong ol i kisim mi na tromoi mi long graun. Mi mangi bilong longwe ples. 5-pela de olgeta mi bin wokabaut i kam long lukim king. Kaikai mama i givim mi i pinis. Mi no save, olsem wanem nau mi bai go bek long ples?"

Yangpela man i pilim sori tru na i tok: **"Noken krai. Kam, yumi tupela go bek. Yu bai lukim king"**.

Taim tupela i kamap long get, mangki i kirap nogut tru. Gad i no sekim yangpela man. Olgeta gat i sanap long lain na soim rispek long em. Yangpela man i holim han bilong em na tupela i wokabaut namel long dad.

Yangpela man i singaut: **"Papa...Papa....i gat wanpela pren bilong mi i laik lukim yu. Em i stap wantaim mi long hia. Yu inap long lukim em a?"**

Manki i amamas bikos em inap lukim king.

■ Taim yumi gat wari, no ken givap. Wokabaut oltaim wantaim Jisas. Em bai harim na blesim yumi.

PNG i sot long gutpela plen na eksen long daunim ol hevi



Bikpela san na ples drai i wok long givim bikpela hevi moa long olgeta hap bilong kantri nau. Long dispela wik yumi harim olsem ol liklik ailan long Is Sepik i sot tru long wara na kaikai na ol i mas lusim ples na go painim wara long narapela ailan o go olgeta long bikples. Long sampela hap olsem Manam ailan, ol pipel i nidim kaikai na wara bikos ol i kisim taim long volkeno na nau ples i drai na ol i painim narapela bikpela hevi moa.

Gavman i wok long givimaut kaikai long ol ples i bungim dispela bikpela hevi. Opis bilong Nesenel Disasta (NDO) i go pas long mekim wok bilong skelim kaikai i go long ol senta na bihain bai ol distrik atoriti i givimaut long ol ples. Praim Minista i tokaut olsem ol distrik atoriti i klia long wanem kain hevi i kamap long distrik na ol bai go pas long skelim kaikai i go long ol pipel. Em i tok save tu olsem sapos ol pipel i no kisim kaikai yet, orait ol i mas tok save hariap long distrik atoriti na bai gavman i ken helpim ol.

Long wankain taim tu, NDO i tok save long ol lain husat i laik helpim na salim kaikai i go long ol dispela lain, i mas wok wantaim Opis bilong Nesenel Disasta. NDO i mekim dispela tok save bihain long ol stilman i stilim ol kaikai long wanpela trak i wok long karim ol saplai i go long Erave las wik. Ripot i tok ol stilman long Yalo Bris na Seven Kona long Kagua i putim rot blok na stopim kontena trak na stilim ol kaikai bilong ol lain

long Erave. Dispela em i wanpela rabis sem pasin stret. Wanem kain pasin nau ya long stilim kaikai bilong ol lain husat i hangre na i sot long kaikai? Ol dispela stilman i no gat rispek na i stap yet long tudak.

Dispela hevi bilong El Nino i kamapim tu planti askim long plen bilong gavman long abrusim ol bikpela hevi dispela birua i save kamapim. Bihain long wankain hevi i kamap long 1997, i bin gat ol saveman i bung na raitim ol plen bilong abrusim dispela kain birua. Tasol i no gat wanpela samting i kamap na ating ol dispela ripot i slip i stap long wanpela opis long Mosbi.

I mas gat plen bilong givim gutpela klinpela wara saplai i go long ol pipel. Ol ailan na ples long nambis i mas gat masin bilong tanim solwara i kamap gutpela wara bilong dring na kukim kaikai. Ol pipel i mas planim ol kain gaden kaikai we i no inap long bagarap hariap na i stap longpela taim. Ol dispela kain plen bilong helpim pipel long taim bilong bikpela san na ples drai i ken wok bikos teknoloji bilong tude inap long helpim yumi. Na i gat ol bikpela riva i stap we yumi ken banisim na pulim long paip i go long ol ples.

PNG i gat inap saveman na meri i stap long mekim ol dispela kain wok bilong kamapim gutpela sindaun bilong pipel. Wanpela bikpela salens bilong ol politikal lida tude, em long givim luksave i go long ol saintis na ol arapela savemanmeri. PNG i sot tru long ol dispela kain saveman na meri. Sapos i gat gutpela stia na helpim



Jada 015!

i go long ol kain wok olsem bai yumi lukim gutpela senis i kamap long ol ples bilong yumi. Na long taim bilong bikpela san na ples i drai, bai ol pipel i no inap painim bikpela hevi tumas.

Tupela wik i go pinis yumi selebretim 40 yia idependends bilong kantri. Ol kain siti olsem Mosbi i lukim bikpela senis tru we i gat ol bikpela rot na ol bikpela haus i kamap, tasol i no gat wanpela senis i kamap long wara saplai na

ilektrik saplai bilong dispela siti. Long taim bilong bikpela san, wara i sot tru na ol i mas katim wara long ol sabab bilong siti. Ilektrik pawa saplai tu i no wok stret. Tasol bikpela mani tru i go yet long wokim ol rot insait long liklik hap bilong siti. Long dispela wik NCD i tokaut long spendim narapela K400 milien gen long ol rot projek bilong siti. Watpo bai ol ino i nap lusim kain mani olsem long painim narapela wara saplai bilong

helpim ol pipel na bisnis long siti?

Wara saplai long Sirinum Dam i no inap long givim gutpela sevis bikos populesen i bikpela tru nau na Eda Ranu wantaim PNG Pawa i save yusim dispela wanpela wara saplai tasol long givim sevis long siti. Yumi nidim seif na rilaiabel wara saplai long Mosbi siti – maski long tromoi planti milien kina klostu klostu i go long ol rot we bai nidim planti milien kina moa long mantenens.

Australia helpim Daru polis

OL polisman long Daru i nau gat nupela haus na opis long mekim wok bilong ol long sait bilong famili na seksual vailens.

Westen Gavana Ati Wobiro i opim nupela haus na tok tenkyu long Gavman bilong Australia long helpim wok bilong polisman long Daru long Saut Flai distrik.

Gavana Wobiro i salensim komyniti na ol manmeri long Saut Flai distrik long senisim Daru i kamap wanpela gutpela ples we vailens o pait na birua namel long family bai no moa i stap.

“Sapos yu tru tru man stret, yu bai laikim meri na pikinini bilong yu nay u bai no inap paitim o krosim ol,” Mista Wobiro i tok.

Ol ripot i tok planti meri long PNG i save bungim hevi wantaim man bilong ol taim ol man i no rispekim ol na paitim o krosim ol.

Ol ripot i kam long 15 provins long PNG i tok moa long 10, 000 meri i bin bungim hevi wantaim man bilong ol insait long 5-pela yia tasol. Dispela em ol hevi we ol meri i bin tokaut long en. Tasol i gat



Nupela haus na opis bilong polisman long Daru we Australia i bin kirapim long mani mak K300, 000.

bilip olsem planti meri i save prêl long man bilong ol na i no save tokaut long dispela kain hevi na vailens insait long famili.

Fes Seketeri bilong Australian Hai Komisin Peter Fennell i tok Australia i stap long helpim PNG daunim hevi na birua ol man i save kamapim long meri bilong ol.

“PNG na Australia i luksave olsem ikonomi bilong kantri

bai gro na kamap strong sapos ol man i lukautim gut ol meri bilong ol na wokbung wantaim ol. Taim ol man i no save lukautim ol meri bilong ol na ol pikinini meri, dispela kain pasin i save kamapim hevi,” Fennell i tok

Asisten Polis Komisina Jim Wan i tok Australia i bin sapotim wok bilong ol polisman long Daru. Las yia Australia i bin baim wanpela nupela kar

na nua ol i mekim dispela nupela haus na opis.

“Polisman i save kisim nem nogut taim ol i save tok mipela i save wansait long ol man. Tasol nau wantaim helpim bilong Australia, mi i kisim gut trening na dispela nupela haus wantaim opis bai helpim mipela long mekim gut wok bilong mipela,” Mista Wan i tok.

Gavman bilong Australia i yusim K300, 000 long kirapim dispela nupela haus na opis.



Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



KIRAP NOGUT NA SORI:

Dorinda Tatum, Reveren Michelle Ledder na Minista Cassandra Henderson i wari, kirap nogut na krai bihain ol i kisim nius long kilim dai bilong Gissendaner.

GEORGIA, AMERIKA:

Namba wan meri long dai bihain ol i sutim em long posin marasin KELLY Gissendaner i kamap namba wan meri long Georgia, Amerika long ol i kilim em i dai insait long 70 krismas, maski Pop Francis i askim ol atoriti long pogivim em na i noken kilim dai em.

Ol i bin sutim Kelly Gissendaner, 47, wantaim posin sut marasin long 12.21 bik moning Georgia taim, na em i dai.

Ol i bin kalabusim Gissendaner long plen na kilim dai man bilong em, Douglas long yia 1997.

Pope Francis, husat i piniism 6-pela de wokabaut long Amerika long wiken i bin askim ol atoriti long noken kilim dai meri ya, na long pogivim em, tasol ol i no harim na kilim dai Gissendane. Laspela meri ol i bin kilim em i dai long Georgia em long 1945.

Em i kamap namba 16 meri long dai long dispela rot.



KISIM 17 YIA KALABUS:

FLAI in na aut wokman husat i bin kilim dai wanpela man long caravan pak i kisim 17 yia long kalabus.

Kot i painim Ryan Hawke bilong Orange Grove, saut bilong Perth i gilti.

Suprim Kot i bin harim olsem Hawke i bin kros nogut tru bikos patna bilong em i tokim em olsem taim em i stap aut long wok, meri ya i bin slip wantaim Koller, na em i go tasol na naipim em i dai.

Hawke na patna bilong em i ronawe, tasol ol i painim ol neks de na putim ol long han bilong lo.



Afghan akademi ol i save kolim nem olsem, 'Sandhurst in the sand'.



Wanpela Afghan Ami opisa na kedet i sanap long Afghanistan Nesenel Ami Opisa Akademi long arere bilong Kabul. (Credit: ABC licensed)

Pait long ol Taliban insait long akademi we Afghan sekyuriti fos i stap

Danielle Moylan long Afghanistan

TAIM ol ami bilong Afghan i no win long kisim bek noten siti bilong Kunduz long han bilong ol Taliban, maski ol US ami balus i tromoi bom long ol, Danielle Moylan i lukluk gen long ami bilong Afghanistan.

Ausait long Kabul, we ol Afghan nomad i sanapim ol tent bilong ol long sama taim arere long ol mad-brik haus bilong ol, wanpela naispela yangpela man i sanap Guria na wet long narapela sait bilong rot.

Mohammad, i gat 28-krismas em i bin stap wanpela soldia long Afghan Nesenel Ami pastaim , em i askim long mipela kisim em na kisim stori long em insait long kar bilong mi, em i pret nogut bai ol i luksave long em.

Pastaim long dispela yia, Afghan Nesenel Sekyuriti Fos (ANSF) i stat long stopim ol memba bilong fos pastaim long no ken toktok long ol nius ripota. Sapos ol i mekim bai ol i mekim save long ol.

Long dispela as planti soldia i no laik long tokaut long wanem samting tru i kamap insait.

"Komanda bilong mi bai solapim mi sampela taim nating maski mi no mekim wanpela rong na em bai

putim mi long diuti long planti mun," Mohammed, wanpela eks soldia, i tok.

Em i klostu long wanpela yia nau planti ol intenesel trup i bin lusim Afghanistan, na ol i givim wok i go bek long sekyuriti fos bilong kantri i go long nesenel fos.

Insait long namba wan 6-pela mun bilong 2015, nius bilong Amerika Nu Yok Times i tok samting olsem 4,100 Afghan sekyuriti fos na 7,800 i bin kisim bagarap, em i 50 pesen moa long wankain taim long las yia.

Long olgeta hap bilong Afhanistan, ol Taliban na ol narapela militent grup i save stap long ol sekyuriti poin na dispela wik ol i kisim Kunduz wanpela kepitai siti.

Mohammed i tok: "I no gat inap mani long mak bilong bagarap i stap long hia."

"Ol i no gat rispek long ol sodia," Mohammed i tok.

"Mipela i save pait long kaikai, bikos mipela i no save kisim inap kaikai."

OL NATO trup na Australia Difens Fos (ADF) diga i bin go bek pinis lusim ol ples bilong pait tasol tausen soldia i stap yet long kantri long lainim, na givim tok stil long ol 350,000 strong sekyuriti fos bilong Afghanistan.

Japan De Festival i selebretim 40 yia pren wantaim PNG

Oi Pot Mosbi Bris Klap memba
i soim tumbuna danis bilong Japan, Rok Soran



Tupela liklik Pot Mosbi Bris Klap memba i kisim presen long tupela
Judo Instraksa bihain long tupela i soim stail bilong pilai Judo.



Koto (String instrumen bilong Japan) Ekselensi Morio Matsumoto (R) na wanpela meri musisen i pilai.



JAPAN Ryugakusei Asosiesen (JARA) na Ela Motors i bin holim wanpela Festival De wantaim Embesi bilong Japain, PNG Judo Fed-eresen, Japan Asosiesen bilong Pot Mosbi (JAPOM) na Bridge Klap PNG long Sarere, Septemba 19, long Yunivesiti bilong Papua Niugini Foram Skwea.

Festival i bin stat long 2 klok long apinun na em i bin soim ol sampela kalsa bilong Japan olsem judo o masel ats, koto tumbuna string musik instrumen, kendama trik bilong ol Japan-ese toi, rok soran danis, kontemporeri Japan tumbuna danis na pasin tumbuna bilong mekim rais kek.

Dispela festival de bilong Japan i go wantaim 40 yia indipendens eniveseri bilong Papua Niug-

ini, bilong tingim 40 yia diplometik wok bung bilong Japan na Papua Niugini.

Dispela yia bilong tingim bek em i bikpela samting long tingting bilong Japan na PNG bikos tupela kantri i stap strong yet long wok bung na wanbel long nesenel na intenesenel level.


Embesi bilong Japan i bin redim sampela kalsa wok bilong Japan olsem Turisem Promosen Leksa, Hinamatsuri (dol) Festival, Soim Origami, Japan-PNG Rilesens Leksa na Tanabata (sta Festival).

Ol dispela kalsa wok i givim sampela insait save bilong kalsa na wei bilong Japan long ol PNG pipel, na long dispela wei em bai strongim moa pasin poroman na wok namel long tupela kantri.

Japan tumbuna wei bilong wokim rais kek




Raun wantaim Wantok kru ...



Ol paita bilong Maui Thai wantaim Ekting Dairekta bilong MIAC, Motsy David i sanap long sait.

Muay Thai pait bai kamap long PNG



Esther Bralyn Wani i raitim

PAPUA Niugini (PNG) bai lukim nupela spot, Muay Thai, we i no kamap bikipela long hia. Tasol long Oktoba 31 bai gat bikipela Wol Sempionsip Pait namel long wanpela PNG paita wantaim Wol Sempion bilong dispela pait.

Dispela pait bai kamap namel long Lee "Flash" Garap husat i stap namba wan Kontenda long Wol bai pait wantaim Petchanong Banchamek bilong Thailand.

Long wankain taim, dispela Jungle Intelligence Limited/ Flash Muay Thai PNG we Lee i stap aninit long en i wok bung wantaim Melenesien Institiut bilong Ats na Komyunikesen (MIAC).

Deputi Din bilong Plening long UPNG na Ekting Dairekta bilong MIAC, Motsy David, i tok i gat tripela as long wanem ol i wok wantaim Muay Thai.

"Namba wan as MIAC i wok bung wantaim ol em insait long bildim network, long disaplin i stap insait, long save, intelijen bi-

long spot yet, bisnis sait bilong em na turism sait bilong em na planti moa," Mista David i tok.

Em i tok namba tu as long kamapim wanpela hap we ol sumatin na woklain bilong UPNG i ken amamas na joinim long sait bilong helt. Em i tok sapos ol i stap helti bai het bilong ol sumatin i ken klia na ol i ken wokim gut long skul na wankain long ol woklain.

Mista David i tok, "Namba 3 as em yuni-vesiti i gat komyuniti obligesen o wok, mipela mas go aut na mi save nau olsem ol i helpim ol yut i no gat wok na dispela spot i kisim taim bilong ol na ol i bilip olsem ol i ken mekim bikipela samting long kantri.

"Olsem Deputi Din bilong skul bilong humanitis long UPNG na Ekting Dairekta bilong MIAC, wok bilong mipela em long go aut na helpim ol na sapotim ol na lukluk long longpela plen we ol sumatin, ol woklain na ol komyuniti tu i ken stap insait," Mista David i tok.

Long wankain taim, man i painim Flash

Muay Thai PNG, Pavel Jerry Nossar Sarufa, i tok ol i wok bung wantaim MIAC long sait bilong tingting na helt wantaim.

"Lee em wanpela profesenel etlit insait long PNG. Em bai lukluk long pait gen long tripela wol taitel sapos em i winim dispela wol taitel.

Lee "Flash" Garap i amamas na em i redi long salensim dispela wol sempion long Oktoba 31.

"Mi bin pait wantaim sampela gutpela man pastaim, planti ol man bilong kilim ol man tasol mi save olsem bai mi pait gut long tupela bipo.

Lee i kisim nem bilong em "Flash" bikos em i save winim pait bipo long 60 seken, lastpela pait bilong em, em bin win long 40 seken tasol.

Ol i painim yet sampela sponso husat i laik sapotim ol i ken salim email long ol long dispela edres; jungle.intelligence.ltd@gmail.com o ringim Jerry long 73550074. I gat ol benefit bilong ol sponso tu i stap.

Jem Sesen wantaim X-Tension Ben long Botsed (RPYC)



EM i wanpela bikipela nait gen long jem sesen i save kamap long wan wan mun we X-Tension Ben, Pepsi na Royal Papua Yot Klab i putim narapela nait bilong ol Laiv entatenmen.

X-Tension Ben husat i save pilai olgeta taim i mekim wanpela stail pefomens o so na tu i bin no gat narapela ol ekt long dispela nait.

Ol Jem Sesen i save kamap long laspela Sarere bilong olgeta mun wantaim neks wan bai kamap hariap long 24 Oktoba long wanem Australia Hai Komisin i putim haia long Tension ben long pilai bilong ol long Oktoba 31.

Lastpela Jem Sesen bai kamap long 28 Novemba.

Stori bilong tumbuna

Bus ol i kolim Iden

Tupela manmeri i save stap insait long wanpela bikipela bus. Dispela bus ol i kolim Iden.

Tupela i save stap amamas olgeta taim, bikos nogat hatwok long wokim gaden na haus na ol arapela wok. No gat wanpela samting long givim hevi o hatwok long tupela. Tupela i wok long kisim fri kaikai olsem o put na kaikai na ol bus kumu na ol arapela kaikai tu. Olsem tasol na sindaun bilong tupela i no hat tumas. Tupela i no gat klos tasol tupela i save stap amamas.

Wanpela de, meri i bungim sampela put bilong apinun kaikai em i ksim sampela put we i gat pait long en wantaim. Orait apinun tupela i sindaun amamas na kaikai pinis na tupela i stap sotpela taim liklik na pilim olsem het bilong tupela i spin na tupela i kamap longlong olgeta. Nau tupela i kam aut long bus na i go insait long ples we i gat hat wok long en.

Long dispela taim stret, tupela i kisim save bilong mekim hatwok na kamapim kaikai long hatwok na sindaun gut. Na tu tupela i kisim save bilong kamapim pikinini we inapim olgeta ples.

Taim tupela i go insait long hatwok, tupela i salim tingting i go bek long dispela bus ples i no gat hatwok long en. Tupela manmeri i kamapim tupela pikinini man. Na tupela indai i go pinis na tupela pikinini man i kamapim man na planti namba manmeri i kamap long dispela tupela man. Na ol inapim olgeta hap graun i kam inap nau mipela i stap.



Salin Jatu i salim

TOKSAVE:


WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500.

Tenkyu


Em nau! Ol pikinini i ken painim rot i go long ples wantaim Wantok kru...



EM ORAIT



EM NOGUT



Ol wod lista hia:

ARAKAIN
 ASEMBLI
 BEKSAIT
 BIKNAIT
 BLAUS
 DIESEL
 DUTI
 ESIA
 FIVA
 GRILE
 HAPKAS
 HIPIM
 INTERES
 KALAPUA
 KENDIDET
 LITIMAPIM
 LUSLAIN
 MASKET
 NILDAUN
 ONAIM
 PAINAPOL
 RAUNIM
 SANDAVEL
 TAITOL
 TEMPEL

S S E S D L T S S L I H A M A D N D N V
 D D T A N E T Y E P O K V Z M E B S E E
 I I A S M T T P F Y N G M E J P Q D J R
 S M T A T B M L O G A M T E X X L Y M Q
 E C T R V E B D U T I U M S N E U B E W
 L H U Z T K H S E P M S Q M T E S G N T
 A O S W P S M K A L A P U A C O L O E P
 S E X S K A T M I N C E C S L E A D Y T
 E U B A P I I R A A D I F K N O I E T F
 M I L L N T R N I H E A I E L D N A H I
 B N A D I C A I A I S A V T N N K U D H
 L T U L G R F L H P R R A E R V R F E G
 I E S I A N L D A I O C K E L E N H S X
 A R A K A I N A P M I L L O G T E I D M
 R E V M S V H U K H S O T I E E Q S W E
 A S T T B I K N A I T W D E W O V D N V
 U X X L S R G A S I P V N A A P G I E O
 N X G R I L E O A D S A H I R P S Y O O
 I O O D S C Y T F P A C G F O R S A F M
 M I K E A E G Z I H S I K B X P G X Z C

Tok Pilai wantaim Kanage



Taim blong protes mas igo long palamen long givim petisen igo long ol memba long taim bilong ol long sindaun long vot ov no konfides. Tupela hap blong bung, wanpela long Unagi ovol na narapela long Kone pilai graun long Waigani.

Long avenun tru bikman blong polis itok nogat long protes mas na planti lain ino save long dispela na ol man i ting olsem bai igat mas. Kanage tu laik mas, so em i redim em yet blong tumora.

Bik moning tru kanage lusim Morata na kamap long beksait blong Kone pilai giraun na wokim liklik protes mas toksave blong em long wanpela kadbod box aste yet em haitim long en.

Em kisim traipela retpela maka na rait olsem long kadbod "RAUSIM SOMARE GAVMAN, PIPEL I LES LONG EM!!" Putim nil long kadbod antap long liklik stik diwai na em karim long solda blong em long bungim ol manmeri bai bung long fran blong kone pilai graun.

Em fowat mas igo na sem taim wok long singaut...'RAUSIM SOMARE GAVMAN, MIPELA SAFA INAP, PIPEL I LES PINIS...' em no kam autsait long kona blog kapa blong kone fil yet na iwok long bikmaus istap.

Long fran blong pila graun, wanpela 10 sita bilong polis i sanap na nogat man o meri istap long dispela hap, polis kar tasol istap.


Em nau, kanage fowat mas, karim protes mas kadbod blong em na singaut wantaim i kam long sait blong kapa banis. Ol polis man long kar i harim nek blong wanpla man i wok long singaut na wet tasol long husait bai kamap long kona blong banis.

Kanage, singaut 'RAUSIM SOMARE GAVMAN PIPEL I LES PINIS, 'SENISIN SOMARE GAVMAN' na em tanim kona blong kapa. Em abrusim olsem tri mita liklik na em hapim het na lukim barel blong gan i sut kam autsait long windo blong polis kar..

Kanage, hariap tru dropim kadbod olsem emi no karim wanpela samting na singaut i senis igo long "HUSAIT TOK BAI YUPLA RAUSIM SOMARE GAVMAN, EM STAP NA YUPLA STAP, YAH, KAIKAI LEEEEKK!!" kanage leg pas long as na saitim geit blong Kone fil igo daun long Morata bas stop.

Side Kona Joe
M.B Hohola

Ansa bilong Wod Pilai isu 2141





TOK PISIN NEWS

from Radio Australia

radioaustralia.net.au

Harim TOK PISIN long

Radio Australia

101.9FM

Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Wari i kamap long Bogenvil Wimen Senta



Autonomous Bogenville Palaman

Sam Seke i raitim

Meri husat i sanap makim Not Bogenvil long ABG Palaman i tok displa senta i no op yet na kamapim wari long ol meri. Not Bogenvil Wimen Representativ long Atonomas Rijon bilong Bogenvil Gavman i tokaut strong olsem ol i mas hariap na stretim ol toktok long nupela Wimen Risos Senta long Buka taun. Senta yau tupela Nesenel Palamen Memba bilong Not Bogenvil, Lautu Atoi

na pastaim Not Bogenvil Women ABG Representativ, Elizabeth Burain i bin wokim wantaim mani bilong gavman. Mis Semoso i tokaut long ABG palamen long dispela wik olsem ol meri bilong Bogenvil i laik yusim dispela bilding, tasol em i sanap nating long 6-pela mun pini. Mis Semoso husat i Deputi Spika tu long ABG palamen i tokim Redio Australia olsem sapos ol i no stretim toktok long en hariap, bai em i kisim ligal edvais long en.

Wes Papua pipel i sutim tok long indonesia Polis long dai bilong ol sumatin



Wes Papua Ektivis, Ronnie Kareni


Caroline Tiriman i raitim

Wanpela lida na ektivis bilong Wes Papua i tok em i no kirap nogut long harim stori olsem ol polis bilong indonesia i sutim tupela yangpela man bilong Wes Papua long ol displa wik tasol. Ronnie Kareni husat i save stap long Australia i mekim dispela toktok bihainim ol ripot we i sutim tok long polis bilong indonesia long sutim i dai wanpela yangpela man na narapela i kisim bagarap na emi stap long haus sik.

Ol i sutim tok long polis long mekim wan kain pasin long tupela narapla yangpela man long mun i go pinis. Ol dispela ripot i tok tu olsem polis i bin sutim ol dispela yangpela man long taun bilong Timika long wanem ol famili bilong ol i save sapotim indipendens bilong Wes Papua. Long dispela wik yet, Solomon Ailans Praim Minista, Mannaseh Sogovare bai toktok long wari bilong Wes Papua long Yunaitet Nesens Jeneral Asembli (UN) long Nu Yok, bikipela siti bilong Yunaitet Stets bilong Amerika.

Solomon Ailans Temotu premia i lusim wok

Ol stori na poto: ABC



Plak bilong Solomon Ailans

Sam Seke i raitim

SPIKA bilong Temotu Provinsal Asembli long Solomon Ailans i tokaut olsem Baddeley Tau Soakifono i pinis nau long wok bilong em olsem Premia bilong Temotu. Spika Johnson Levela em i tokim pinis olgeta provinsal memba na ministri bilong provinsal gavman long Honiara olsem Premia bilong Temotu em i lusim

wok bilong en o i resain pinis. Mista Levela i tok ol nominesin i op long 9 klok asde long i lektim nupela premia bai ol i holim long provinsal kepitai, Lata long 10 klok long tude. Mista Soakifono i no tokaut stret long as tingting long em i laik risain long wok olsem premia. Tasol spika i tok em i bai sainim wanpela pas we em bai tok Premia Soakifono em i resain.

Wes Papua pipel i sutim tok long indonesia Polis long dai bilong ol sumatin



Wes Papua Ektivis, Ronnie Kareni

Caroline Tiriman i raitim

Wanpela lida na ektivis bilong Wes Papua i tok em i no kirap nogut long harim stori olsem ol polis bilong indonesia i sutim tupela yangpela man bilong Wes Papua long ol displa wik tasol. Ronnie Kareni husat i save stap long Australia i mekim dispela toktok bihainim ol ripot we i sutim tok long polis bilong indonesia long sutim i dai wanpela yangpela man na narapela i kisim bagarap na emi stap long haus sik. Ol i sutim tok long polis long mekim

wan kain pasin long tupela narapla yangpela man long mun i go pinis. Ol dispela ripot i tok tu olsem polis i bin sutim ol dispela yangpela man long taun bilong Timika long wanem ol famili bilong ol i save sapotim indipendens bilong Wes Papua. Long dispela wik yet, Solomon Ailans Praim Minista, Mannaseh Sogovare bai toktok long wari bilong Wes Papua long Yunaitet Nesens Jeneral Asembli (UN) long Nu Yok, bikipela siti bilong Yunaitet Stets bilong Amerika.

Mangro Polisi i no gat lo long banisim em



Ol memba bilong grup we i bin kamap long dispela kibung long Tunde dispela wik long Laguna Hotel, NCD.

Poto: Frieda Sila Kana

Frieda Sila Kana i raitim

MANGRO, em i save kamapim planti samting long laip bilong planti pipel husat i save stap long ol nambis na long ol ples we wara i karamapim.

Bipo taim ol pipel i lukim tasol olsem em i wanpela diwai we i save kamap planti na pasim ples o em i diwai we as bilong em i save kamap olsem ples bilong painim ol abus olsem kuka, sel na tu ol pis i save putim kiau na kamapim nupela pis. Ol diwai bilong en em ol man i save yusim olsem paiawut, stik bilong pulim kanu long wara na solwara, pos bilong wokim haus o banis bilong gaden na pik, na sit bilong em i bilong kaikai tru. Tasol wanpela bikpela wok bilong diwai mangro we ol pipel bilong PNG i no bin save klia bipo em i olsem em i save kamap olsem banis long stopim solwara long kam insait long graun na brukim graun i go insait long ol ples.

Wanpela bung i bin kamap long dispela wik long Tunde dispela wik long Laguna Hotel long Pot Mosbi we ol dipatmen husat i gat sampela

wok long lukautim envaironmen na kisim ol samting i kamaut long solwara, wara na graun bilong wokim mani na strongim ikonomi i bin kamap long bungim ol NGO, sivel sosaiti, rurel komyuniti wantaim USAID na JICA husat em tupela bilong ol developmen patna we i save helpim wok bilong daunim ol bagarap i save kamap long klaimet senis.

Dispela bung ol i kolim long "Mangro bung" em i lukim Klaimet na envaironmen Proteksien Atoriti, pastaim Opis bilong Klaimet Senis, Nesenel Fiseris Atoriti, Nesenel Forestri Atoriti, Nesa Konsevensi, Patna wantaim Melanesia wantaim USAID na projek bilong en MARSH we i kam bung wantaim ol maus man na maus meri bilong komyuniti long kamapim samela rekomendesen bilong wanpela Mangro Developmen Polisi.

Ol i bin kamap wantaim 6-pela bikpela polisi rekomendesen bilong givim i go long Minista bilong envaironmen na Konsevesen na Klaimet Senis. Ol dispela bikpela toktok em long:

- 1 Nesenel Mangro Polisi,

- 2 Risev Mango bilong Komyuniti Laip na ikosistem sevis,
- 3 Spesel Menesmen Eria,
- 4 Gaidlain bilong Operesen na Katim ol Timba long ol ples i gat planti wara,
- 5 Mangro Dipenden Fiseris Developmen na Menesmen Strateji,
- 6 Mangro Komiti.

Embeseda bilong Yunaitet Stets long PNG, Solomon Ailans na Vanuatu i bin kamap long dispela bung na i givim auto I buk we spesel projek bilong MARSH i bin kamapim long givim trening long ol pipel long lukautim gut ol mangro diwai long opim dispela bung.

Bikpela tingting we i kamaut long stat bilong dispela wanpela de kibung em olsem, long ol dipatmen we i gat sampela wok long mekim wantaim diwai mangro, i no gat klia piksa long husat tru i papa long wok bilong lukautim na banisim dispela diwai.

Olsem na ol i luksave olsem i mas gat lejislesen o lo long kamapim as bilong ol polisi na wok bilong lukautim mangro bai em i ken stap longpela taim bilong lukautim envaironmen.

CPL Opim namba 32 City Pharmacy stua

TAIM PNG i selebretim 40 yia indipendens aniverseri long 16 September, 2015 CPL Grup i opim gen wanpela moa brens bilong en taim ol i opim namba 32 City Pharmacy stua long Maun Hagen insait long Tininga Dobel.

Em i gat 135-skwea mita na em i soim aut piksa bilong wanpela kain stua we ol pipel inap long go baim samting isi stret.

Ok kastoma husat i save stap na wok klostu long dispela hap i gat isans long makim ol gutpela prodak wantaim pepa prodak dokta o long kaunta yet (OTC) long baim ol marasin, na ol samting bilong bilas olsem kosmetik, novelti samting na ol sneks.

"Bikpela samting long City Pharmacy bisnis em long strong long helt ke," CPL Grup CEO Ravi Singh i tok.

"Mipela bai kamapim yet ol nupela we bilong kamapim komyuniti pharmacy, long kamap olsem ples bilong ol pipel long painim helpim isi long helt ke insait long komyu-



Blesim nupela brens.

niti. Mipela i gat nes stesim we wanpela nes bai stap olgeta taim long helpim ol pipel husat i kam long hap." Mista Singh i tok.

Dispela City Pharmacy em i namba 3 brens insait long Maun Hagen. I gat tupela narapela brens i stap pinis, wanpela insait long Best Buy na narapela insait long Hagen Drive.

Dispela nupela brens i bungim ol marasin na ol medikal ikwipmen

sapalai wantaim ol marasin we ol i ken baim antap tasol long kaunta long stua.

City Pharmacy i gat we bilong em yet long tok halo long ol nupela kastoma bilong en long Maun Hagen.

Olgeta lain i save long ol promosen bilong en, olsem na olgeta lain husat i kam long opening i bin kisim wanpela spesel ofa long helpim long baim wanem samting ol i bin wok long wet long baim.



INVESTMEN TOKTOK wantaim Dokta Stephen Nash

Wanem samting i save kamapim senis long Wok bilong Nambawan Super

- Hap namba foa: Wok bilong ol mani
- Sapos yu gat sampela askim, plis salim long toktoksuper@nambawansuper.com.pg na mipela bai bekim.

Dispela hap toktok em bilong pinisim ol toktok bilong Nambawan Super Limited (NSL), long ol samting i save mekim senis long ol invesmen wok bilong NSL. Pas-taim ol invesmen bilong PNG Kina (PGK) (PGK) ol kain kain mani ikwiti, ol bon, propeti, i stap insait. Long dispela toktok, invesmen we NSL i mekim wantaim ol narapela mani, we i no-PGK mani em bai stap namel long ol mak bilong ol narapela mani bilong wol, taim ol i makim long PGK, em bai mekim senis long mani mak bilong ol dispela invesmen.

Moa klia, wok bilong "prais" bilong PGK, long mak bilong narapela karensi o mani, em ol i save kolim olsem reit bilong eksens o senisim mani, na reit bilong eksens em i save kamap wantaim 4-pela ziro mani mak bihain long desimal poin (.). Na tu, tupela kain mani we ol i stap long eksens o senisim mani, em ol i kolim olsem "karensi per" olsem na , PGK/AUD em i "karensi poroman" bilong PGK na Australia dola (AUD).

Wanpela eksampel bai i soim gut piksa. Long tok klia, sapos 1PGK bai senis i go long 49 Australia sens (AUD), em bai reit bilong eksens, bilong PGK/AUD karensi poroman, ol inap kolim olsem, PGK/AUD 0.4900.

Sapos eksens reit bilong karensi poroman i surik olsem long PGK/AUD 0.4900, i go long PGK/AUD 0.4850, em bai PGK i diprisiet o i lusim pawa bilong en wantaim AUD, na em i minim olsem AUD i kamap strong o winim PGK long lukluk bilong namba wan eksens reit, sapos ol i traim wanpela taim long senisim AUD 1000 i go long PGK, long reit bilong PGK/AUD 0.4900, em bai mani mak long taim ol i senisim bai kamap olsem PGK 2041 (1000/.4900), i go long mani mak bilong PGK.

Long lukluk bilong namba tu reit bilong eksens, taim PGK i pundaun, long mak bilong em wantaim AUD, long reit bilong PGK/AUD 0.4850, mani mak bilong PGK, bilong senisim i go long AUD 1000 bai go antap long PGK 2062 (1000/.4850); em i go antap PGK 21 moa, taim yu skelim wantaim namba wan reit bilong eksens.

Lukim long narapela kain wei, sapos PGK i go strong long mak wantaim AUD, em bai oposit o narapela sait bai kamap olsem bai yu lukim olsem mani mak bilong PGK long senisim wantaim AUD bai i go daun.

Putim dispela wokabaut bilong karensi long NSL invesmen, yu ken lukim olsem invesmen bilong NSL, we i stap yet long ol narapela karensi na i no long PNG karensi, em bai ol i mas lukluk long en gen klostu, klostu bikos PGK i save surik i go antap na kamdaun olgeta taim, taim yu skelim em wantaim ol narapela karensi long wol. Ol aset we i no stap long PGK em ol i holim wanpela bikpela hap bilong ol NSL aset, stat long 2014, NSL i gat 14 pesen bilong ol valui bilong potfolio bilong en long non-PGK aset, olsem piksa i soim daunbilo long Piksa 1,

2014 NSL Investment Portfolio Composition




Fig 1. As NSL/KFM

Long sampela taim, hevi bilong karensi senis em olsem em i save mekim valui bilong potfolio i go antap; taim PGK i reit i pundaun go daun aninit long ol globol karensi. Long ol narapela taim, hevi i no gutpela. Karamapim olgeta em, NSL i save kisim kain kain mani mak long ol mani we i no PGK we em i save kamapim na dispela kain kain em i wanpela bilong ol samting we i save strongim wok bilong dilim ol aset we i no stap long PGK.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIKPELA, GUTPELA, SEIF, STRONGPELA NA I STAP NAMBA WAN YET.



Gavman Givim tok orait long Ramu NiCo Envairomen Plen



Wok painimaut long KBK wara



Ramu NiCo gat spesel masin long sekim solwara



Sedimentesin pond long KBK Main



Sekim ol pis long Ramu han-wara

NESENEL Gavman long las mun tasol i givim tok-orait long envairomen plen bilong Ramu NiCo Projek long Madang provins.

Dispela fainol tok-orait em blong op-eresinol envairomen menesmen plen (OEMP) i bin kamap long las mun Ogas 18, 2015.

Menesing Dairekta bilong Envairomen Konsevesin Envairomen na Proteksin Atoriti (CEPA), Gunther Joku i givim fainol tok-orait bilong OEMP.

Mista Joku i tok bihain long ol ripot bilong Ramu NiCo i go long CEPA, Gavman i givim tok-orait long dispel plen.

Stat long 2011 taim Ramu NiCo i givim

namba wan OEMP i go long Dipatmen ov Envairomen na Konsevesin (DEC), Kampani i bin yusim dispel long karimaut wok bilong en na save stretim long olgeta yia. Dispela OEMP i gat wanem wok Ramu NiCo i mas wokim insait long wok bilong en stat long konstraksen taim bilong en i go long prodaksen taim bilong en. Dispela OEMP em ol wok plen Kampani i mas bihainim long lukautim bus, graun, wara na solwara we em i wok long en insait long Madang provins.

Long yia 2011 i kam inap long Ogas 18, 2015 Helt, Sefti na Envairomen (HSE) tim bilong Ramu Nico i bin raitim leta i go long CEPA long kisim long-taim OEMP, na long

Ogas 18, 2015 dispela yia em tok-orait em Kampani i kisim.

Dispela tok-orait bilong OEMP nau i putim Ramu NiCo Projek long sanap strong long wok bilong en long lukautim na wok wantaim bus, graun, wara na solwara stat long Kurumbukari i go daun olgeta long Basamuk Rifaineri na tu 135 kilomita slari Paiplain.

Insait long pastaim OEMP we DEC i givim tok-orait long 2011 we Kampani i ken yusim long sotpela taim, Ramu NiCo i bin yusim long taim bilong komising i go insait long prodaksen i stat. Dispela i kisim moa long tupela yia

Long dispela taim tu i lukim long sait bi-

long Operesins Marin Monitoring Proqram (OMMP) ol wok sekim i wok long go long han bilong lan Hargreaves na Asosiet bilong Australa. Em wanpela indipenden konsalten. Dispela ol wok sekim em lan Hargreaves indipenden konsalten i wokim we i go wantaim permit kondisen bihain long tupela yia long karimaut wok long rifaineri na dip si teilings plesmen system operesin.

CEP bai go het yet long putim ai o monita long Ramu NiCo OEMP long olgeta kwata insait long wan wan yia long karimaut wok sekim long bihainim wanem samting em i laikim i mas kamap insait long plen.



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015

Venue: DWU & PNG Maritime College



An initiative of:
National Apex Mining
Safety Council



Under the auspices of:
Mineral Resources Authority

Wallabies i daunim Uruguay long Ragbi Wol Kap



NAMBA tu string Australia Wallabies i ran wantaim 11 trai na i hamarim ol Uruguay 65-3 long Villa Pak pilai graun.

Wantaim dispela, ol i isi tasol kisim top ples bilong Ragbi Wol Kap Pul A na i stap pas long Ingran na Wels.

Tim i kamap sempion tupela taim bipo i opim ai bilong em gen na i daunim Fiji 25-13 long las wik Fonde.

Dispela tim i putim 5-pela trai long namba wan hap bilong pilai na i kisim fri poin bilong em long las wik Sande.

Winga bilong ol Australia, Drew Mitchell, i putim tupela trai insait long 5-pela minit long namba tu hap bilong pilai.

Ol Wels i daunim ol Ingran pas, tasol ol Australia i putim 11 trai i givim ol poin antap

long ol Wels.

Flai hap, Quade Cooper, i kikim 5-pela kik tasol i go insait long ol trai ol i putim na ol i rausim em long stap 10 minit ausait bikos em i kisim hai takel long Bernard Foley bilong Uruguay.

Taim Cooper i stap ausait, ol Uruguay i gat gupela taim na i mekim ran bilong ol gut na i kisim wanpela penelti gol we flai hap bilong ol, Felipe Berchesi, i putim go insait long namba 23 minit.

Stail open sait flenka bilong ol Wallabies, Sean McMahon, i pasim bal i go long winga bilong ol, Joe Tomane, long namba 7 minit na Tomane i putim namba wan trai bilong ol Australia.

Kapten bilong ol Australia, Dean Mumm, senta bilong

ol, Henry Speight, na fowod bilong ol, Ben McCalman, i bung wantaim Cooper taim em i kam insait na ol i givim Australia 31-3 long taim bilong malolo.

Australia i stopim ol Uruguay long namba tu hap long skruim skoa bilong ol taim McCalman na McMahon i putim tupela trai na pusim skoa bilong ol Australia i go antap long 50.

Senta bilong Wallabies, Matt Toomua, i skoarim namba 10 trai long 70 minit na Uruguay i no kisim wanpela poin long namba tu hap bilong pilai.

Uruguay i painim hat yet long skruim skoa bilong ol i slekim banis bilong ol na Tevita Kuridrani bilong Australia i putim wanpela trai na ol i kamap wantaim 11-pela trai.

Wallabies kapten i amamas long ol i winim ol Uruguay



NUPELA kapten bilong ol Australia Wallabies, Dean Mumm, i amamas long ol i winim ol Uruguay long las wiken long Ragbi Wol Kap.

Mumm i kamap namba 84 skipa bilong ol Wallabies na em i putim wanpela trai long las wik Sande pilai we ol i daunim ol Uruguay 65-3.

"Het bilong mi i spin yet bikos mipela i gat wanpela kain de we mipela i no save i gat pastaim," Mumm i tok.

"Olgeta manmeri husat i stap long hia i sapotim mi na dispela i mekim isi long mi long go pas long ol boi bilong mi."

Mumm i stap long trening hap bilong ol Wallabies long Bath na i mekim tu aua draiv

na i go kamap eli long London long Fraide moning long lukim pikinini boi bilong em i bon taim meri bilong em, Serah, i ringim em long 3:40 am.

Em i joinim tim bilong em gen long Sarere moning na i tok olsem em i painim hat tru long lusim gem.

Ol Wallabies nau bai pilai wantaim ol London na pasim wantaim ol Ingran long Twickenham long Sande.

Ol i lukluk long winim neks gem wantaim ol London we ol bai go pilai long asples bilong ol.

Kosa bilong ol, Michael Cheika, na ol man bilong em i amamas long abrusim bikipela namba bilong ol manmeri bai

raunim dispela gem bai kamap, tasol Mumm em i wanpela long ol Wallabies i laik i go long London bikos long lukim yangpela boi bilong em.

"Mi lukluk long dispela bikos mi no holim pikinini boi bilong mi yet," Mumm i tok.

"Mi bai go long hap na holim em i wanpela bikipela na spesol samting.

"Mipela i save pinis olsem dispela em bai bikipela gem na mipela bai go long daun taun London bai wankain olsem mipela i stap long Bath.

"Ples bilong trening bai senis, tasol lukluk bilong mipela long mekim ol nupela samting long winim gem bai no inap senis."

Broncos na Cowboys bai pilai

NRL gren fainel



BRISBANE Broncos na Not Kwinnsan Cowboys bai pilai gren fainel bilong Nesenel Ragbi Lig long dispela wik Sande.

Not Kwinnsan i kisim maiden taitel we em i save i gat bel long kisim dispela taitel inap long 20 yia.

Sapota bilong ol Cowboys i mekim sampela eksen ausait long kapitel bilong stet bikos ol i winim ol fainel na i stap long pila gren fainel.

Ol namel man husat i stap long dispela taim i tromoi ai bi-

long ol i go long ol Townsville.

Ol Kwinnsan i laikim Wayne Benneth, tasol ol i laikim Johnathan Thurston moa.

Benneth i go pas long ol Kwinnsan Ragbi Lig na i kisim ol i go long Holi Land bilong klab futbol. Brisbane i winim Sydney resis long yia 1992 na i stiaim klap long kisim 5-pela moa taitel na bihain ol i go insait long 2008 NRL sisen.

Thurston i no misim wanpela Orijin gem taim em i stat long pilai wantaim ol Maroons long yia 2005 inap nau.

Pilai bilong em insait long 11 yia i soim kala bilong Stet na Kwinnsan i win 9-pela taim long lain.

Em i wanpela namba wan pilaia we em i save redim olgeta samting bilong ol Kwinnsan i ken amamas.

Em i wanpela kwait sempion husat i save givim pilai helmet bilong em long ol yangpela sapota long olgeta taim em i save pilai.

Ol pikinini long Not bai sapotim Cowboys nau bikos ol i save laikim Thurston.



Ol poto: NRL

NOT Kwinnsan Cowboys i daunim ol Melbourne Storms 32-12 na nau tupela Kwinnsan tim bai go long NRL gren fainel.

Brisbane Broncos i daunim ol Sydney Roosters long Fraide nait 31-12 long kisim ples bilong go long gren fainel.

Dispela em i namba wan taim we Cowboys i daunim Storms na tupela tim bilong Kwinnsan bai go long gren fainel.

Justin O'Neill i putim tupela trai, Michael Morgan i putim tupela trai na Gavin Cooper i

putim tupela trai bilong Brisbane na ol Cowboys tu i bihainim lek mak bilong ol Broncos long putim ol trai.

Johnathan Thurston i soim tru kala bilong em na Cowboys i daunim ol Broncos.

Thurston i kisim bagarap liklik, tasol em i tok em bai orait long taim bilong lainap bilong ol Cowboys long namba tu gren fainel bai kamap.

"Mi bai orait long go pilai, em i liklik mak tasol na em i no bikipela samting," Thurston i tok.

Cowboys i putim wanpela trai bihain long 5-pela minit i

go pinis, tasol ol i tok nogat na ol Storms i putim wanpela trai long namba 10 minit na i bin stap pas long ol Cowboys.

Tasol, ol Kwinnsan i stap pas gen long ol Storms taim bipo pilai bilong Storms, O'Neill, i putim tupela trai bilong ol Kwinnsan.

Cowboys i stap pas long namba wan hap na rausim ol Storms long namba tu hap.

Wankain samting i kamap long ol Broncos we ol i daunim ol Roosters long namba wan hap na long namba tu hap tu ol i rausim ol olsem ol Cowboys i mekim.

Kosa bilong SP Hunters i amamas long PM 13



MIPELA KAM GUT YA: Kosa bilong PNG PMs 13 Stanley Tepend i tokaut long strong bilong tim bilong husat i bungim Australia PMs13 long las wik Sarere. Tepend i amamas tru long tim bilong em wantaim kepten Albert Patak taim ol toktok long ol nius manmeri. *Poto Nicky Bernard.*

Philemon Tame i raitim

KOSA bilong ol SP PNG Hunters, Michael Marum, i amamas long pilai bilong ol pilaia bilong PNG Prait Minista 13.

Pilai i kamap namel long ol PNG na Australia we Australia i win 40-12 long las wik Sarere long Sir John Guise pilai graun long Pot Mosbi.

Tasol, Kosa Marum, i bin stap long dispela taim ol i pilai na i lukluk gut long ol kala bilong ol pilaia bilong PNG na i tok luk olsem ol i pilai gut tru.

Ol i no selektim sampela pilaia bilong ol Hunters long pilai long PNG Prait Minista 13 bikos ol i stap long fainel bilong Kwinslan Intras Supa Kap.

Taim Marum i lukim Prait Minista 13 pilai i kamap, em i redi long makim ol pilaia bilong em gut long 2016 sisen.

Kosa bilong PNG Prait Minista XIII, Stanley Tepend, i tok aut long midia bung bilong tupela kosa bilong PNG na Australia olsem ol PNG bai daunim ol Australia bikos ol i stap long asples bilong ol.

Namba bilong tiket ol i

salim i soim olsem mak bilong ol manmeri i stap insait long pilai graun long lukim gem em i 18, 113, na dispela i kisim olgeta ples bilong sindaun long lukim gem.

Sapot bilong ol PNG i kamap narapela kain tru we ol i tingting long strongim ol PNG tasol, nogat. Australia i bin kisim moa strong taim ol sapota i singaut long ol na i daunim ol long asples bilong ol.

Long namba 10 minit bilong pilai, winga bilong Australia, David Nofoaluma, husat i save pilai long Wests Tigers long Australian Nesenel Ragbi Lig i bin putim namba wan trai.

Pilaia bilong ol Canberra, Jerrod Croker, i bin putim namba tu trai long 16 minit na ol PNG i no kisim wanpela poin long dispela taim.

PNG i traim hat yet long kisim sampela poin na long namba 28 minit, winga bilong PNG Justin Olam i skruim poin bilong ol wantaim wanpela trai na bikpela nois i kirap taim ol manmeri i singaut na sekim sia bilong sindaun.

David Missian i putim kik i

go insait na namba wan hap skoa i sanap olsem Australia 10 na PNG 6.

Nofoaluma i bin putim namba wan trai bilong Australia long namba wan hap i putim narapela trai gen klostu long ol i go insait long namba tu hap bilong pilai.

Bihain long tripela minit i go, Euan Aitken bilong Illawarra i putim narapela trai na Australia i stap pas olgeta.

Bihain long 10 minit i go, Watson Boas i putim namba tu trai bilong ol asples na skoa i sanap olsem 12 taim Missian i putim kik i go insait.

Pilaia bilong Rabbitohs, Chris McQueen, i putim narapela trai bilong Australia bihain long trai bilong PNG.

Australia i pasim gem wantaim pilaia bilong Penrith, Jeremy Latimore i putim wanpela trai long 77 minit na long 80 minit, Jack Wighton i putim las trai we Australia i daunim PNG wantaim 28 poin.

Long lukluk bilong pablik ol manmeri i lukim olsem PNG PM 13 i pilai gut na daunim kala bilong ol pilaia bilong ol SP Hunters.

Australian anda 18 i daunim ol PNG Lewa

OL Pasifik MMI PNG Lewa i go daun long Australia long pilai wantaim tim bilong ol Australian anda 18 gel long Allan Boda pilai graun long Brisbane.

Ol Lewa i stap pas wantaim namba wan skoa ol i kisim, tasol ol Australia i kamap namba wan long pinis bilong pilai wantaim 157 skoa.

Mebo Ipi, Norma Ovasuru, Varoi Morea, Sibona Jimmy na Kaia Arua i wok bung wantaim na kamap wantaim strongpela kala bilong pilai egensim ol yangpela meri bola long Australia.

Ol Australia i no gat wanpela trabel i kamap long tingting bilong ol long kisim ol skoa, tasol ol i lusim wanpela wanpela wiket tasol.

"Long wokabaut bilong yumi, dispela em wanpela

strepela kala mipela i soim," kosa bilong Pasifik MMI PNG Lewa, Rodney Maha i tok.

"Mipela i ting olsem pilai bai kamap strong tumas bikos mipela i pilai egensim ol nambawan yangpela meri pilaia husat i save pilai kriket long Australia. Long dispela as, mipela i makim long kisim 50 ova na mipela i mekim olsem.

"Planti bat meri bilong mipela i kisim stat, tasol nau mipela i stap long senisim ol dispela stat i go insait long ol bikpela skoa.

"Mipela i wok long mekim gut long wanwan wokabaut pilai na nau mipela bai wokim olsem yet i go long fainel resis."

Pasifik MMI Lewa i pilai wantaim Australian anda 18 tim namba tu bilong ol gel na

ol i kam bek long PNG long Mande.

Ol pilai bilong Pasifik MMI PNG Lewa em;

- | | |
|----|-----------------|
| 1 | Norma Ovasuru |
| 2 | Tanya Ruma |
| 3 | Helen Buruka |
| 4 | Varoi Morea |
| 5 | Kopi John |
| 6 | Pauke Siaka |
| 7 | Veru Kila Frank |
| 8 | Kaia Arua |
| 9 | Ravini Oa |
| 10 | Mairi Tom |
| 11 | Brenda Tau |
| 12 | Sibona Jimmy |
| 13 | Mebo Ipi |
| 14 | Konio Oala |

Kosa bilong ol em Rodney Maha, Peter Williams em i namba tu kosa, Greg Campbell em i tim menesa na Gayan Loku em i tim menesa tu.

Jets i kamap sempion bilong Kwinslan Intra Supa Kap fainel

RISAL bilong fainel resis namel long Ipswich Jets na Townsville Blackhawks i kamap wankain long Maiden Intra Supa Kap premiasip, tasol Jets i daunim ol Blackhawks long las minit wantaim 32-20.

Jets i stap las long ol fainel, tasol ol i pilai strong na i winim dispela resis.

Ol Not Kwinslan i pilai gut taim ol i statim gem we pilaia bilong ol, Tom Humble, i putim namba wan trai long sait bilong ol Blackhawks na ol i ting olsem ol bai daunim birua tim bilong ol.

Tasol, ran bilong Marmin Barba i helpim ol Jets na i

soim gutpela kala bilong pilai bilong em we ol Jets i skruim ol skoa bilong ol kwik taim.

Barba i putim wanpela trai bilong em yet bihain long ol Blackhawks i mekim wanpela asua, na tim poro bilong em Zac Santo i putim narapela trai gen na ol Jet i stap pas 12-8 taim ol Blackhawks i abrus long tupela kik bilong ol.

Ol Jet i go aut wantaim amamas long kisim malolo taim namba wan hap bilong pilai i pinis bikos Carlin Anderson i putim narapela traim gen long sait lain na skoa i sanap olsem 16-8 we kik i no go insait.

Long namba tu hap bilong

pilai, ol Jet i wok long go pas yet, tasol ol Blackhawks i strong tumas na skruim poin bilong ol i kam antap long 20 we Jet i winim ol wantaim 32.

Ol i Jet i win wantaim 12 poin em ol i setim rekot bilong dispela kap.

Ol Townsville i pilim nogut long ol i lus, tasol ol i winim maina premiasip na i go long gren fainel tu long namba wan sisen bilong ol long Kwinslan kap.

Ol Jet bai pilai egensim wina bilong Nu Saut Wels Kap em ol Newcastle Knights, long ANZ pilai graun long taim bilong Nesenel Ragbi Lig gren fainel bai kamap long ANZ pilai graun.

BSP Kimbe i apgredim pilai graun



Ol woklain na sumatin i sindaun bung wantaim long taim bilong opim basketbal kot na volibal kot long Hoskins Vokesenel Skul bilong ol gel long Kimbe.

BENK Saut Pasifik (BSP) i apgredim basketbal na volibal pilai graun long Hoskins Vokesenel Skul (HGVC) bilong ol gel long Kimbe.

BSP Kimbe i kisim dispela projek long asembli hap i go inap long multi-spot indo fesiliti na i givim long HGVC we nau ol i gat nupela pilai graun bilong basketbal na volibal.

Dispela indo fesiliti em i wanpela tasol i stap insait long provins na mak bilong hap bilong pilai em i orait stret we i gat 3-pela level sia bilong sindaun na lukim pilai.

Dispela apgreding i apim tingting na amamas bilong skul na ol sumatin moa.

BSP Kimbe i givim 100 aua na moa long ol wokman na wokmeri bilong em na ol i klinim na penim ol pilai graun, wokim nupela sia bilong sindaun na i putim nupela bod.

Prinsipal bilong HGVC, Virginia Colada, i tok olsem dispela wok em i wanpela plen we mipela i save i gat long mekim na nau BSP i mekim na driman we mipela

i save i gat em i karim kaikai.

"Mi tok tenkyu long BSP long stretim hap bilong mekim asembli na tu ol i stretim indo fesiliti em i bikpela samting bikos em i wanpela fesiliti tasol insait long provins," Colada i tok.

Brens Menesa bilong BSP Kimbe, Peter Tikot i tok, "Dispela projek i kisim planti taim tru long pinisim, tasol wok mipela i bin mekim i kamap namba wan tru na dispela i karim amamas i kam insait long komyuniti em i bikpela samting."

"Mipela i amamas long kamap poro wantaim komyuniti. Dispela wok em i no benk tasol i wokim, nogat. Ol wok lain bilong benk na ol famili bilong ol i wok bung wantaim na wok i kamap long mak.

"Mipela i laikim ol sumatin na ol pipel bilong komyuniti long yusim gut na lukautim gut ol dispela sevis," Colada i tok.

BSP i givim planti komyuniti projek long helt, edukesen na ol spot program insait long ol komyuniti.

PNG sumatin i kamapim namba wan ragbi lig long Cebu, Philippines

PAPUA Niugini sumatin husat i save skul long Cebu, Philippines i kamapim namba wan ragbi lig long Cebu long 12 Septemba.

Cebu em i namba tu siti bilong Philippines na ol manmeri long hap i no save long pilai ragbi, tasol ol PNG sumatin i kamapim dispela tonamen long amamasim 40 yia aniveseri bilong PNG.

Plant PNG sumatin na ol manmeri husat i save stap long hap i save pilai ragbi yunion long ol lokel klap insait Cebu Siti, Davao Siti na Manila.

Tasol, ragbi lig em i nesenel spot bilong PNG na ol sumatin i kamapim ragbi lig tonamen na i pilai egensim ol yet we ol pipel bilong i no save pilai bipo.

Dispela em i nupela spot we ol pipel long Cebu i lukim na grup husat i go pas long dispela pilai em tupela Sivil Enjiniering sumatin long Yunivesiti bilong Sauten Philippines Faundesin (USPF).

Tupela sumatin em Winston Maniat i winim 27 kris-mas na em i kamap long miks papa na mama long Enga na Sandaun provins na Hilary Koban i winim 30 yia na em i bilong Otonomos



Pilai i kamap namel long tupela tim bilong ol PNG Sumatin husat i save stap long Cebu, Philippines i amamasim 40 yia aniveseri indipendens de bilong PNG.

Rijon bilong Bogenvil.

OL PNG sumatin i save skul long Yunivesiti bilong San Carlos (USC), USPF na Indiana Aerospace Yunivesiti (IAU) i bin bung na rausim mani long poket bilong ol yet long kamapim dispela tonamen bikos i no gat wanpela sponsa i stap long sponsaim ol.

"Tonamen i bin kamap olsem mipela i plen long en," Mista Maniat na Mista Koban i tok.

"Tripela yunivesiti i pilai, tasol wanpela tim insait long ol yunivesiti i stop long pilai taim mipela i redim ol samt-ing pinis bikos ol i tok long joinim long 2016."

USC i kamap sempion bilong dispela indipendens kap amamas pilai.

Ol sumatin i amamas long pilai dispela tonamen gen long 2016 long taim bilong indipendens de bilong PNG.

POMRFL i gat 3-pela moa raun i stap yet

Philemon Tame i raitim

POT Mosbi Ragbi Futbal Lig (POMRFL) resis i gat tripela raun i stap yet long go long ol fainel.

Long las wiken Sande pilai i bin kamap long Mari Bareks i soim olsem em i raun 23 bilong ol man na raun 19 bilong ol meri i resis.

Opisa bilong dispela resis, Meke Maino, i tok resis bilong ol tim i kamap strong bikos ol tim i pait strong long kisim wanpela ples long fainel.

"Ol tim husait i stap long top 8 bai go insait long fainel bilong ol man na top 6 tim

bai go insait long fainel bilong ol meri," Maino i tok.

"Royals klap i go pas long resis bilong ol man na meri wantaim we i no gat wanpela tim i daunim ol na i luk olsem em bai kisim maina premi-asip."

Long pilai i kamap long las wiken, Royals i stap pas yet na i daunim birua tim wantaim 18-14 long A Gret resis bilong ol man.

Ol i stopim gem bilong ol meri long dispela taim, tasol ol i stap paslain yet.

Ol narapela risalt bilong resis bilong ol man i soim olsem ol Tarangau i kisim wan-

kain poin wantaim birua tim bilong ol Paga Panthers 4-4.

Oro Butterflies i daunim ol Kone Storm 8-0 na Dobo warriors i daunim ol Kone Tiger 8-4.

Long pilai bilong ol meri, Souths i kisim wankain poin wantaim ol Sisters 4-4.

Maino i tok tenkyu long PNG Difens Fos long larim ol pilai insait long Mari Bareks pilai graun wantaim i no gat sampela birua pasin i kamap.

Ol POMRFL bod memba i bung long Mande na i toktok long prais mani bilong wina na ol i kamap wantaim wanpela det we gren fainel bai kamap.

Goroka bai hostim Hailans lek bilong Besta Kap

FAINEL lek bilong yia Besta Futbol Asosiesen Kap bai kamap long Nesenel Spot Institut (NSI) long Goroka, Isten Hailans Provins long Oktoba 9 i go inap long Oktoba 11.

PNGFA i laikim olgeta futbol klap long mekim tim bilong ol man na ol meri wantaim.

Husat ol lain i laik pilai long dispela tonamen i mas stap memba nau o memba bilong PNGFA.

Ol asosiesen memba mas baim K1000 rejistresen fi i go long PNGFA na rejistarim ol pilaia bilong ol tu long

memba asosiesen.

Presiden bilong Goroka Futbol Asosiesen, Cathy Agunam, i tok wok redi bilong pilai i go het na ol wan tim i mas baim K500 bilong ol bai pilai long dispela tonamen pastaim long ol bai bungim pinis taim long Oktoba 5.

Agunam i tok, "Mipela i laikim ol asosiesen i mas redi gut long go long fainel. Ol tim husat bai go long fainel bai go long Besta Kap Fainel long Lae, Morobe.

Olgeta tim i mas kam long

Goroka long Oktoba 8 wantaim ol risit bilong diposit slip bilong benk we ol i yusim long baim fi.

Bilong Niugini Ailan em tim Manus bilong ol man na tim KTSA bilong ol meri redi pinis long kam.

Long Momase em Lae Futbol Asosiesen tim bilong ol man na tim Lahi bilong ol meri i redi pinis.

Bilong Sauten Rijon em Koupa 3 na Koupa 2 tim bilong ol man i kwalifai long go long Lae na Pot Mosbi Soka Asosiesen tim bilong ol meri.

NSL bai stat long Novemba

NESENEL Soka Lig (NSL) sisen bilong 2015 i go inap long 2016 bai stat long Novemba.

NSL i tokim ol Franchise klap long givim ol nem bilong ol long Trinde (asde) wantaim K5000 fi bilong ol.

Liklik tim tasol ol bai kisim na em 5-pela long Sauten rijon na 5-pela long Noten rijon wantaim olgeta mak we ol i fit long pilai.

Ol mak em ol Franchise

klap mas kam olsem kampani na i rejista wantaim IPA na i no gat wanpela asua i stap long onasip bilong long klap.

Ol klap i mas i gat asples bilong pilai o ol i mas i gat wanpela pilai graun bilong ol yet insait long tripela yia.

Na tu ol i mas soim olsem ol i orait long kamap wantaim ol fainensel komitmen long taim bilong sisen.

TNSL bod i kisim tok orait

wantaim PNGFA na i tok aut olsem ol Franchise tim em ol i gat wok long givim travel na akomodesen long baim riji-nal resis, tasol i no long ol semi fainel na gren fainel.

Olgeta Franchise husat bai givim EIO bai stap long bung bilong menesa o franchise ona we ol bai holim long Pot Mosbi long Oktomba.

Yia afliiesen fi em i K60,000 na ol i mas baim bipo Oktoba 30.



Tim husait i winim dispela indipendens kap pilai bilong ol PNG sumatin long Philippines na ol i soim ol medol long tropi ol i winim.

Travel to Tabubil
When were you home last?



"Specials Available now"

Linking our country

Reservations - Toll Free: 1805465 Email: sales.linkpng@airniugini.com.pg

Find us on Facebook: www.facebook.com/linkpng



PMs 13: PNG vs Australia


Lukim ol eksen poto bilong tupela tim i pilai long Sarere las wik. Australia i win 40-12.



TRAIM TASOL: PNG Prait Minista 13 tim i pilai gut tru long Sarere nait wantaim ol Australia PMs 13. PNG i nogat ol biknem pilaia long sait bilong ol. Olgeta pilaia i kamap aut long Digicel Kap na Zone pilai. PNG PMs 13 i pilai strong long stat bilong pilai i go inap i pinis bilong pilai. Maski ol i lus long Australia 40-12, tasol plan-ti ol sapota i amamas long pilai bilong ol. PMs 13 i save kamap long olgeta yia long mun Sep-temba. Dispela em i namba 11 yia nau pilai i kamap.

Ol poto na stori Nicky Bernard





SPOT'S

**Lukim websait
bilong mipela**

www.wantokniuspepa.com

Isu 2142

Wan wik: Fonde, Oktoba 1 - 7, 2015.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



**Emi tuna
bilong PNG**

PROUDLY
**PNG
MADE**

Manufactured by



RD Tuna Canners Ltd.

Moa mit na
oil insait



DIANA Blu

TUNA IN OIL

Kosa Clearly i amamas long nupela spot fesiliti

Philemon Tame i raitim

KOSA bilong Australia Prait Minista 13, Ivan Clearly, i lukim nupela spot fesiliti wantaim planti manmeri i pulap insait long pilai graun na em i tok em bai no inap lus tingting long dispela eksperiens.

Na tu em i amamas long ol boi bilong em long Australia i daunim ol PNG 40-12 long pilai i kamap long las wik Sarere nait long ai bilong 18, 113 manmeri.

"Sia bilong ol manmeri bai sindaun na lukim pilai em i 15, 000, tasol 3000 na moa manmeri i stap ekstra," Clearly i tok.

"Long ol yia i go pinis taim Prait Minista 13 pilai i save kamap, ol manmeri i save kalapim diwai na ol pawa pos long lukim ol PNG i pilai, tasol nau dispela pasin i no moa kamap na planti ol yelopela sia tu i stap nating.

Ol Kumul bilong PNG i kam wanpela aua pas na i mekim sampela liklik trening bipo long pilai, tasol ol Australia i redi yet long tim hotel na ol i kalap long tim bas na i kam stret long pilai graun.

Ol manmeri i singaut taim Segeyaro i pilai wantaim ol Australia, tasol em i pilai isi long daunim singaut bilong ol.

Ol manmeri i no pilim gut taim NRL referi, Gavin Reynolds, i givim planti penelti i go long Australia, tasol ol i smail gen taim hap bek bilong PNG, Watson Boas, i putim wanpela trai we ol PNG i stap bek yet we skoa i sanap ol 24-12.

Bihain long dispela, ol Australia i skruim 16 poin em ol i putim las trai we Chris McQueen, Euan Aitken, Jeremy Latomore na fulbek Jack Wighton i pasim olgeta trai.

Tasol, ol PNG i pilai gut bikos pablik i tok kala bilong ol kumul i winim kala bilong ol SP Hunters.



TAKOLIM EM WANTAIM BAL: Tupela pilaia bilong PNG PMs 13 i hapim bikpela fowod bilong Australia PMs 13 long pilai bilong ol long Sarere las wik. Australia i win 40-12. Poto Nicky Bernard



Strongpela Marasin Bilong Kus Gutpela Prais

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg